

**ASO TOFI, 28 JANUARI 2021**

*Na nofoia e le Fofoga Fetalai le Nofoa i le itula e 9:25 i le taeao.*

Tatalo.

**FOFOGA FETALAI:** Ou te faasila sila atu ua toe amatalia Taualumaga ma Galuega a le Fono Aoao Faitulafono.

Avea ia lenei avanoa ou te faatalofa atu ai ma le agaga faaaloalo i le paia o le Palemene ua mafai ona tatou auvaa potopoto i lenei taeao e faaauau le tatou Galuega, i lau Afioga i le Palemia ma le Kapaneta, faapea foi Minisita Lagolago ma Taitafono ma sui usufono mamalu uma o le Fono Aoao Faitulafono.

Avea foi lenei avanoa ou te faafetai atu ai i lau Afioga i le Sui Fofoga Fetalai, lou uso i le galuega ona o le galuega e pei ona feagai ai ma le taitaiga o le tatou Fonotaga i le aso ananafi. Malo le galulue.

Ia, e i ai le manatu, e sosoo lava le fau ma le fau pe a taliu mai lava faiga filifiliga a le atunu, o le mea sili o lo o faafogoa pea le itumalo i le ta galuega faifaatasi.

**TULAFONO TAU FAAOFI O LE FAATATAUINA O TUPE  
FAAOPOOPO (NU.1) 2020/2021 – felafolafoaiga faaauau i  
luga o le fatauga faalua – Aso 7**

**FOFOGA FETALAI:** E tolopo le Fono ananafi o lo o faapena ona saunoa le sui usufono mamalu mai le itumalo faaalaalafaga o Falealili Sisifo. Ma lou faaaloalo ou te tapa lau Afioga i le sui usufono mamalu, tulai maia e faaauau lau saunoaga.

**Tofa AUMUA ISAIA LAMEKO (Falealili Sisifo):** Lau Afioga i le Fofoga Fetalai, faafetai mo lou avanoa i lenei taeao. Faafetai i le Atua ua taitai mai lo outou soifua ma sou ola i lenei taeao. E ui lava ina louloua le tau, ia o foliga vaaia ia o le alofa o le Atua ia Samoa.

E faatalofa atu i lau Afioga i le Taitai o le Maota, lau Afioga i le Palemia ma le Kapaneta ma Minisita Lagolago.

E faatalofa atu foi i lau Afioga i le Fofoga Fetalai ma sui usufono o le Palemene o Samoa.

E faatalofa atu foi i le tapuaiga a Le Ao o le Malo, le Sui o le Fono a Sui Tofia, le Faamsinoga Sili ma le Faamsinoga o Soligatulafono, le Peresetene ma le Faamsinoga o Fanua ma Suafa.

E faatalofa atu foi i Faafeagaiga i so o se fatafaitaulaga o lo o faafalelemau i totonu o Samoa, aemaise o atunu mamao.

E toe agai sau faamatalaga, na gata mai ananafi i lo matou pitonuu i Piu, i si o matou nuu i Sapunaoa, ona e i ai vaega e toe faamanino. Atonu o le tausaga ua tuanai sa i ai le laupapa faailoilo sa faatu i le aualatele o le Malo ona faasino ai lea o le matou pitonuu lea o Piu. Mo le silafia e le mamalu o lenei Maota lau Afioga i le Fofoga Fetalai, o le pitonuu o Piu, e i gauta o le pitonuu o Sapunaoa, lea e i le auala ta lea e alu agai gauta. Ma a oo la i gauta i le magalua i le mea lea o lo o i ai auala ia e lua o Lealasopo ma Lealamutu. O Lealasopo la, lea e i ai le pitonuu lenei o Piu. O le mea lena e fia faamanino lau Afioga o le Fofoga Fetalai.

O le mea moni lava lau Afioga i le Fofoga Fetalai, o lo o i ai le poloketi a le Malo lea o lo o i ai i le taimi nei e tauala atu i le Matagaluega o le Punaoa Faalenatura ma le Siosiomaga, lea e pei ona taua e le Taitai o le Malo ananafi, o le bio-gas renewable energy, lea lava o lo o ola ai lava le pitonuu lenei o Piu i le tatou bio-gas lea po o le poloketi lea e faaaoga ai mea o lau o laau.

Lau Afioga i le Fofoga Fetalai, avea foi lenei avanoa e momoli ai le agaga o le faafetai i se tasi o faalapotopotoga o lo o faapena ona tele lona sao, e le gata i lo matou itumalo i Falealili Sisifo faapea foi Sasae, a o Samoa Aoao, o le faalapotopotoga lenei a le ADRA, o le Adventist Development Relief Agency. Sa amataina e le Eklesia Asofitu i Lalovaea e avea o se vaega o atinae fesoasoani a le Eklesia. O le faamoemoe o le ADRA Samoa, e fesoasoani i aiga e vaivai le tamaoaiga, e le faatuaoia, e ala atu lea i le faia o fale apitaga, fale e faatau ai fualau taumafa mata, aemaise o le anoano o nisi atinae ua manuia ai aiga, nuu ma afioaga.

Ona oo mai lea o sau faamatalaga i le Eklesia lenei a le Papatiso Manumalo i Leone, e momoli atu le agaga faafetai...

**FOFOGA FETALAI:** Malie le sui usufono mamalu o saunoa se i tulai mai le faauilavea a le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia):** Lau Afioga i le Fofoga Fetalai, ou te tulai atu i se mea e fia faamalamalama. Ou te faamalo i le sui usufono o lo o sausaunoa nei ona o mataupu ia ua ia toe laga. Sa ou taua i le aso ananafi, o galuega a lo tatou Malo, e le mafai ona faatinoina nuu uma po o pitonuu uma i le tulaga o le faaleleia o se vaega, tai pei o se auala galue ona o totonu lava o nuu, e i ai pitonuu. E pei foi ona ou faailoa atu muamua, o lou lava itumalo e 7 pitonuu. I totonu o pitonuu na, masalo e le

itiiti ifo ma le 50 mea nei o auala galue e tatau ona fai. Ae e le faapea e mafai ona faamalie atoa. A fai lava la se auala e tasi o lou itumalo, ia ua lava lena mo lenei Paeaiga, ae faaaauau le isi mo le isi Paeaiga. A o lea la e faaauala atu i isi vaega o le soifua tulaga ia o fesoasoani, e tai pei o le auala tuai o se faleaoga, e ui ima faatupe mai e faalapotopotoga i fafo, a o paaga ia a le Malo ua uma ona sainia maliega, o le latou fesoasoani lena e omai e lagolagosua i galuega a lo tatou Malo. O lona uiga o vaega uma lava o le Malo. Ia, e taua lava le itu lena. Po o le auala la e agai atu pe toe o ni nai iata taunuu atu a o lea ua alu atu i luma, o lea lava e penefiti le nuu. O isi foi atinae tetele e tai pei o le malae vaalele, na ona tu i Satapuala, a o lea e manuia uma ai le atunuu.

O le mea lea ou te talanoa atu ai ina ia malamalama lelei i ai tagata, leaga e toatele o tatou tagata e pumoomoo lava ma vaapiapi le mafaufau. Pau lava le mea lea e manao i ai, o le manatu faapito i se mea o lo o manuia ai na o latou ae gallo le anoano o mea ia e alu atu, i le tulaga o le tautua a le Malo faalauaitele. E oo lava i TV, e oo i le eletise, toso atu e le eletise, toso le vai, o la e inu ai i aso uma, aso uma, aso uma, ae leai ma se manatunatu i le vai lea e inu ai.

O le tulaga lena o lea na ou tulai atu ai i le aso ananafi, aemaise na o le tasi lava le nuu ia Samoa atoa na fai ai le faataitaiga lea. O le faataitaiga lea e faapitoa lava e faaaoga ni laulaau e gaosi ai se eletise, o le ala foi lena e fai mo sina tamai nuu lava laitiiti, ona le apaapa ai lea i le eletise tele lea e taulai i ai isi nuu. O lona uiga, e i ai le taimi pe alu alu pe le eletise tele lena, a o lea e olaola lelei lava le nuu lea. O lea la na faafogofaga i ai i le aso ananafi, a o saunoa le sui usufono ma ia aumaia, o le mataupu lea na kilia atu i totonu o le Kapaneta le atinae lea. Sa ou fesili atu foi, o le a le mea ua fai faapitoa ai Piu? Ae sau le tali, o si nuu lea, o lea e amatamea i le atinae lea. Ou fai atu, lelei, lelei le mafaufauga.

Lau Afioga i le Fofoga Fetalai, o le tulaga lena. O le isi mataupu taua tele, o le mea lea o le malae taalo. Ia o lea sa tatou faafogafoga ananafi, e i ai le malae taalo i i i Saanapu, o le isi pitonuu o le nuu tele... leai o le nuu tele lea sa saunoa mai ananafi, lea e tu ai i gauta Piu. Lea la e i ai le malae tele lava lea, e masani ona fai ai lakapi a le itumalo, e masani foi ona ou asiiasi atu i ai ma tu ai lau taavale ona o au o le Peresetene, ou te fia vaai i le faagasologa o taaloga. O i tonu la lea e afio mai ai le sui usufono. Ae o lau faalogo, e manao foi Piu ia e fai se latou malae taalo. Ia ou te faamalulu atu i lau Afioga i le sui usufono, a tasi le malae taalo o lou itumalo, ua lava lena, aemaise na o le 2 lava iata e laa mai ai i i, laa mai Piu laa i o i le malae taalo. Se ou te ofo i nei ituiga talosaga faapenei? E manao foi Piu ia e fai sona malae taalo faava-o-Malo ae ou te lagona e le atoa se toa-50 o tagata la e i ai. Lau Afioga i le Fofoga Fetalai, e faapena le fetuunaiga o le tofamamao i le faasoa a lo tatou Malo, e le faapea o le o atu lava faapea mai, fai se matou malae taalo, faapea atu le na alu atu, o le a fai. E te tilotilo muamua po o a

mea ia sa fai e le isi foi Nofoaiga talu ai, e le sui usufono lea sa i ai talu ai. E te vaai po o a mea ia na fai. O le a faapefea ona fai ae faapefea isi itumalo la e tilotilo mai?

Ou te faamalulu atu i lau Afioga, ou te iloa lava lou naunau e fai lelei uma nuu o lou itumalo, o le naunautaiga foi lena o lea e i ai i sui usufono uma lava, a o le upu, e le i fausia Roma i se aso e tasi. O le a le mea na tupu ia Roma? Na alu alu lava Roma pule i le lalolagi atoa, o auala, o le ala foi lena na faigofie ai le talaiga a Paulo. Aisea? O le sasao o auala ma le mananaia o auala i le tafao a Paulo, tafao atu i i tafao ane i o, ona o le mananaia o ni auala. E le i faia le auala lena i se tausaga e tasi, na fai i tausaga e tele, i le anoano o le auro e aumai i lea nuu ma lea nuu, lea malo ma lea malo na osofai e le Malo o Roma ma aveese mai a latou auro. Ia ona omai loa lea atiae ai, atiae faasolosolo.

Lau Afioga i le Fofoga Fetalai, e faapena le mea, fai si mea i lea tausaga, omai i le isi tausaga fai lea mea, ae le o le alu atu lava o le isi faapea, o le a fai uma outou i le tausaga e tasi. E oo ia Amerika, e le mafai ona faia mea uma i le tausaga e tasi, ae piliona ma piliona ma piliona latou Tala o le Tupe. O le a le mea la e i ai? E oo foi ia Amerika ia, ua oo i i le anoano o le mau aitalafu.

Lau Afioga i le Fofoga Fetalai, ia o si tamai faamalamalamaga puupuu lava lena i le saunoaga matagofie a le sui usufono, o lea ou te iloa lou naunau, a o mea uma lava i le tatou olaga, e fua i le tupe, fua i le tupe, aemaise e fua i tagata ia e aumai ai tupe ia pe toatele pe toalaitiiti.

Lau Afioga i le Fofoga Fetalai, ia o le faamalamalamaga lena.

**FOFOGA FETALAI:** Ia, atonu ua aoga le faamalamalamaga a le Taitai o le Malo. Aua foi le naunau tele i le tulaga, aua e faapena uma lava finagalo o itumalo. O si fasi falaoa e maua i lenei tausaga ma si fasi falaoa e maua i lea tausaga, e faapena ona fetuutuunai. E i ai le manatu, tuutuu i le loloto le tofa i lau Afioga i le sui usufono mamalu.

O lo o tau tulai mai le sui usufono mo Palauli le Falefa, pe i ai se mea e fia...

**Afioga Hon Faumuina Tiatia Faaolatane Liuga (Palauli le Falefa):** Ia, lau Afioga i le Fofoga Fetalai pe a maua se faatagaga.

**FOFOGA FETALAI:** Ia, saunoa mai le sui usufono.

**Afioga Hon Faumuina Tiatia Faaolatane Liuga:** Faafetai. Leai na ona toe faamanatu, e i ai foi le isi poloketi faapitoa na fai, o Apolima-tai, na fai ai faapitoa, o le uluai solar system lena, ua 15 tausaga talu ai. E le na o Piu la, e aofia ai ma Apolima-tai. Ma lou faaaloalo.

**FOFOGA FETALAI:** Malo. Ia, faafetai le faamanatu mai o isi atinae.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o lea lava e agai sao lau mataupu i le sui usufono o Piu. Ua uma le saunoaga a Aiga i le Tai. Ae sao la le Minisita, leaga o le Minisita, ou te tau manatu o ia tonu lea sa feagai ai. O la e foi e tau faamanatu mai e le Minisita, leaga o au foi ua fai si ou matua, ua tau galogalo mea.

**FOFOGA FETALAI:** Ia, ma e aoga foi o la e faamanatu mai i si ona taimi sa i ai. Faafetai.

Ia, se i tulai mai le Minisita o Tupe.

**Afioga Hon Sili Epa Tuioti (Minisita o Tupe):** Faafetai i lau Afioga i le Fofoga Fetalai. Leai e na ona faaopoopo atu i le tulaga foi lea e faapea e le faapito, a ia faasalafa atu le fesoasoani i e o lo o manaomia le fesoasoani i le taimi nei, ma faamanatu atu le foai foi lea a le Malo, le miliona lea e ave i le ADRA, e o latou e vaavaai po o ai aiga foi ia o faaletonu fale e nonofo ai ma manaomia le vai, o latou e fai, ia o la e ua avatu i ai ma le tupe lena, ua maua mai foi tala, ua tele fale ua faaleleia. O le tulaga lena e i ai. A o le tulaga foi lea i te i ua faapea ua faapito i se itumalo, a o le fuafuaga lava a le Malo latou ina ia faasalafa atu ia i latou o lo o moomia le fesoasoani, e pei la o le tatou vaegatupe tele lea na tuuina atu i le ADRA, e o latou e vaai po o ai aiga o lo o manaomia le fesoasoani ma avatu tupe ia e faatino ai lo latou tamaoaiga. Ma le faaaloalo lava.

**FOFOGA FETALAI:** Malo. Ia, se i toe tulai mai le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ou te faamalo i le Afioga i le Minisita o Tupe i le tofa fetalai fetuutuunai a le Afioga i le Minisita, ona o le vaai ia i latou ia e i ai manaoga faapitoa ae le o lava lo latou malosi. E taua le mea lea, leaga na ou faalogo na matua faitioina lava e isi vaega le fesoasoani lea, ona o le tulaga lenei lau Afioga, e i ai aiga e matua manaomia lava le fesoasoani. O isi e pe na o le 5 ni nai apa, o isi pe na o le 10 ni apa, o isi pe na o se puipui o le fale e manaomia. O le ituaiga fesoasoani la lea, e taua tele, ma o le faalapotopotoga lea e le fou, ua fai si loaloa o latou faia le galuega lea, ua matua tele lava le poto masani. E i ai foi la isi faalapotopotoga faapea, e tai pei o le faalapotopotoga lea o le Karita a le Ekalesia Katoliko. Ae pei la o le vaega lena e nafa ma tulaga tetele, e tetele fale. A o i, o i tonu lava lea e matua moomia ai lava le fesoasoani. E pei lava ona ou fai atu, po o nisi aiga pe na o le lava ni nai apa e moomia, ae a alu i o i le faletupe, oi, o le tele o le gaosa.

O lea la e taua tele ai le fesoasoani lea, ona o le faalapotopotoga lea o le ADRA, ua leva ona latou nafa ma tulaga ia, ma e faavae lava le latou galuega i le matua o lelei e vaai, o lelei e vaai. Tasi lena vaivaiga sa i ai i isi faalapotopotoga o le sau lava o lea tatalo alu loa ae le o e vaai, matua o e asiasi lelei lava ona omai loa lea latou te iloa. Afai lava o le galuega e \$1,000, na o le \$1,000 lava e manaomia, ae a faapea o le galuega e \$5,000, na o le \$5,000 foi e manaomia. O nai galuega laiti la na, o lea e fai ai lava le latou faamasinoga ma le latou faaiuga e aunoa ma le aafia o le Malo.

O le tulaga lena e matua faaeteete lava le Malo i le tuuaia, o la e foi ua fai ma se tau i ai. A o le tulaga la lena o la e lafo lava ia latou ua leva ona latou faatinoina le mea lea, ma ua maua mai foi e le Malo lipoti i le latou galuega, e ui lava o la e tau ai le Eklesia Asofitu, ae ou te faamalo e i ai se Eklesia faapea e i ai foi se latou faalapotopotoga e agaga i ituiga fesoasoani ia. A o le a ea le fatu atoa o tatou talitonuga faa-kerisiano? O le tautua, auauna, alofa. O le mea lena o lea e faatino e latou nei mo tatou tagata le tagolima. O isi na o le faitio, faitio i isi Eklesia, ae leai se mea o faia.

Lau Afioga i le Fofoga Fetalai, o le tulaga lena o lea e taua ai tele le galuega lea a lea foi Eklesia, ma e faamanuia pea i ai le Malo, ia maua le soifua laulelei o latou o lo o nafa ma galuega nei, galuega alofa faa-Samaria agalelei.

Lau Afioga i le Fofoga Fetalai, o le toe faaopoopo atu lena i le saunoaga a le Minisita o Tupe.

**FOFOGA FETALAI:** Malo faafetai. Ia, se i saunoa mai le sui usufono ua iloa foi o lea e tusi lava i i e lavea a i totonu i le taimi o le lauga ma le taimi foi lea o le lavea, le taimi foi lele. Ioe, ae ua uma si na mea o lea ua manino.

**Tofa AUMUA ISAIA LAMEKO:** Lau Afioga i le Fofoga Fetalai, faafetai mo le avanoa. Faafetai foi mo le faamalamalamaga a le Afioga i le Palemia, faapea foi le Minisita o Tupe faapea le Afioga ia Faumuina e tusa ai ma poloketi ia a le tatou Malo.

O le mea moni lava lau Afioga i le Fofoga Fetalai, e pei ona taua le malae lakapi po o le malae faava-o-Malo i Sapunaoa, na fausia i le tausaga e 2004 ina ua sifi i gauta le aoga mai tai i le sami i le mea sa tu ai. O le malae faava-o-Malo e atoa lelei ona mita, e 120 mita le umi, 70 mita le lautele. Ia o lea foi sa ou tatalo i si ou uso ia Fuimaono, o lo o maua le malae e fai ai latou taaloga. O lo o i ai foi ma isi malae ia e lua pei ona ou taua i le aso ananafi o malae faava-o-Malo i Vaovai ma le malae faava-o-Malo i Saleilua.

Ma e faamalulu atu i le Afioga i le Taitai o le Malo e tusa ai foi ma le talosaga a si o matou nuu i Piu, e mafai lava ona faaaoga le malae lea e tasi e taaaalo uma ai. Ma le agaga faaaloalo.

Ona oo mai lea o sau faamatalaga i nisi o fesoasoani...

**FOFOGA FETALAI:** E pei foi o le matou nuu i Fasitoou-ta ae o taaalo i le malae o Fasitoo-tai. Se, e faigofie lava mea faapena, ae saunoa le sui usufono e faaauau, ae na ona faamanatu atu. O mea ia o la e foi e aafia ai isi itumalo. Ia faaauau le saunoaga a le sui usufono.

**Tofa AUMUA ISAIA LAMEKO:** E momoli atu le agaga faafetai i le Ekalesia Papatino Manumalo i Leone faapena le Ekalesia Mamona ona o le foai na avatu ai nofoa ma laulau mo aoga tulagalua i si o matou itumalo. Ou te iloa e le lava le faasoa a le Malo e auala atu i ia aseta, ae faafetai le agalelei. Faamanua le Atua i la outou foai.

Ona oo mai lea o sau faamatalaga i le tatou Malo, i aseta foi nei o Taaloga a le Pasefika lea sa tofutofusia ai aoga tulaga lua, ae le gata i lea o le kolisi i Falealili. Faafetai mo ia vaega uma.

Ona oo mai lea o sau faamatalaga na gata i le aso ananafi, lau Afioga i le Fofoga Fetalai, o lea ua afio mai le Afioga i le Minisita o Galuega, ia o galuega lava nei sa talosagaina lau Afioga. Ia o lea o le a ou toe faalaulaunina atu ina ia silafia foi ne i faapea si o matou itumalo e leai se galuega sa faia. O le tele o auala sa i ai, sa faataina e le Malo i tausaga ua tuanai, peitai ona o lea ua sui le tulaga ua ave i ai le faamuamua a le tatou Malo i le Koviti-19, e pei o le agaga lena e talosagaina ai pea ma faamauina, e i ai le auala galue i gauta o Tafatafa. Ia, e talosagaina foi le faia o ni alavai...

**FOFOGA FETALAI:** Ia, se i tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga o se mea e fia faasao. E leai e le o suia, o lea lava e faaauau i le malosi e gafatia. O lona uiga, o lea lava e faatino a tatou galuega o le Koviti-19, a o lea foi e taumafai lava foi nai auala ia ua uma ona fai i ai le iuga a latou foi o le Matagaluega ina ua foi mai a latou asiasiga ma latou matauina ma aumai ai le fautuaga, o auala lava e tatau ona fai. Ae leai se mea e te popole ai, e oo atu lava le faasoa, aemaise o i i le alu atu i i, o lea e i ai le vai. O le vai tele la lea o lea e inu ai Falealili, ae leai lava ma se tala a le Ofisa o le Vai o la e o i ai, fai mai latou, e ui lava e le o faataina, ae pei lava o la e ta i le manaia o le auala. O le mea la lea, e leai foi la se mea e te popole tele ai, e faapea lava ona faasolosolo faasolosolo faasolosolo, o lea foi ua faamau. Ua e vaai mai, e tusitusi uma lava le Kabeneta, ua e vaai mai i le tama matua lea, o lea foi e tusitusi ia, o la e e tusitusi Tialavea. E tusitusi uma lava matou, faaopoopo i ai ma Ofisa Sili o Pulega o Matagaluega. Ae pau lava lea o le mea ou te faasaoa, o le lauga o le Minisita ae tulai mai le sui usufono tuai lea ua leva ona i totonu ma matau mai mea a le Kabeneta, ini mai lava na o se Minisita fai mai, o la e le o tusitusi, a o lea e tilotilo mai lava o lea ou te faamaumauina. E misi mai le isi, ae le mafai ona misi i le Taitai o le Malo,

leaga o aga na a le Taitai, a misi mai le Minisita ae o lea e faamau i i, o aga na a le mea e igoa o le Taitai. A e fia Taitai la, tapena e te galue pe oo lava ina e le moe, galue ma usupo mai le ta o le 9 e amata ai le Fono, a o lea o le a ta le 10 e le i usu mai Taitai o le Vaega lea. O le a le mea... O aso la a o matou i ai ma Tofilau, e tuai mai loa lea ae savavali mai ae pei e autifatifa i le taeao faatoa ta le 11 a o lea faatoa omai, fai mai Tofilau, o le mea lea e leaga ai le mea lenei, e le faamaoni i itumalo, inu ava inu ava i le po atoa omai onana i le Fono a. Omai faasuaava i le Fono. Ou te mai foi o tifatifa mai Olo ia i le taeao nei. Ia e tiga lava ona fai mai toeaiina, se leai ma te le i inu i le taeao nei. Fai mai, o, ia outou manatua, o Tofilau o le siamupini o mea ia a ua leva ona tuu, ua leva ona tuu. O lea e iloa uma ai lava e Tofilau aga uma lava a tagata na alu le po atoa o inu, tuai mai i le Fono pe le sau foi i le Fono ae savali tifatifa mai. O lea la ua outou faafogaga e leai lava ma sau upu faapena o faia, a o upu ia na ou faia nei i le taeao o upu a Fono i aso la, lea o le a ou toe vaai atu e pei o le a toe tulai mai. Tuu se i uma le faiga palota. A o le fai ua lalata le faiga palota, ia, ia afio maia lau Afioga...

**Susuga Hon Laauli Polataivao Leuatea (Gagaifomauga Nu.3):** Lau Afioga i le Fofoga Fetalai, e fia maua se avanoa...

**FOFOGA FETALAI:** Ia, se i alofa ia le sui usufono mo Falealili Sisifo, see ese mai lea mea.

Ia se i tulai mai Olo, le sui usufono mo Salega Sasae.

**Tofa Olo Fiti Afoa Vaai (Salega Sasae):** Lau Afioga i le Fofoga Fetalai ona o lea na taua lota igoa. Leai na o si mea lava sa fia... sa ou taumafai atu i le aso ananafi, o lea foi ou te faamaumaolina, a ou le avea i Afioga i Minisita se isi mea ua misi, ia pe o le a ou tali atu ai pe a uma mai le faiga palota i le mea lea sa saunoa i ai sui usufono.

A o le tulaga o le mea lea na saunoa i ai le Palemia i le matou vaega, o le mea lea a ua leai foi laua, ia ua ou taitai. O le faiga lena o matou mea. E le pei o mea a le HRPP, e tasi lava le Taitai. O le lelei lena o le faiga o mea faapea. E pei o le mea lena ua ou tulai atu ai e faasao le saunoaga ma le faaaloalo.

**FOFOGA FETALAI:** Ia, tulai mai le sui usufono.

**Susuga Hon Laauli Polataivao Leuatea:** Lau Afioga i le Fofoga Fetalai, se leaga o lea na taua lota igoa faamolemole. Ioe, malie lau Afioga, faafetai mo lou avanoa. Le tatou nuu, a outou maua mai lou leo, a uma loa ona fai tou malu taeao, agai mai loa i le fale Fono o lea ou te faatali atu. O le ala lea o lou tuai mai i le taeao lenei lau Afioga i le Fofoga Fetalai, o la e i uta si ou itumalo, na masii mai po o le a le mea ua tuai atu ai le matou talanoaga foi

lea e faasolo. Ae fai atu, e le mafai ona fai se mea seiloga e uma le fono, o le ala lea e faamalulu atu i lau Afioga i le Palemia a ou le i ai, Olo will take over. Ia ma le agaga faaaloalo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ua matua ou talia lelei. Ma e le i faapea foi, na natia i fatu alavai se tuualalo, aua o uiga lava ia o matou e ave le fesoasoani i e ua vaivai. O lau la fesoasoani, tofi aloaia ni a outou taitai se toa-4. A aloaia lelei, e le iloa po o le mea lena o lea ua tuai mai ai le Saofaapito, o le fai faapena o a outou mea.

**Tofa Olo Fiti Afoa Vaai (Salega Sasae):** E leaga e na ona ou tatalo atu i le Palemia, se i i ai se taimi se i taitai ifo ai le Afioga a Tuitama, ae fai lava na o ia.

**FOFOGA FETALAI:** Se se i alofa Olo, e a pe a e faaaloalo ia Laauli e matua. O le a fetufaai la ouluu ae faafefea Faumui ia. O le a le taimi e take over ai Faumui.

**Tofa Olo Fiti Afoa Vaai:** O lau failautusi lau Afioga.

**Afioga Faumuina Asi Pauli Wayne Fong (Nuu Tu Taulaga Sisifo):** Lau Afioga i le Fofoga Fetalai, o lenei ua fiafia le agaga ua tilotilo atu ua e toe afio mai i lenei taeao. Ua maua foi lou malosi, ma ua faafouina foi lou malosi. Ia faafetai mo lou manatu mai, e i ai lava le taimi e faaalia ai le taitai moni, ioe. Aua a fua i le matua, e matua Fiame, sosoo ai au, sosoo ai Olo sosoo ai ma Laauli. O lona uiga o i ina e faasolo mai ai le matou vaega. Ma le faaaloalo lava pe a o fia iloa tele se...

**FOFOGA FETALAI:** Ia talosia ia e taitai Faumuina. Malo faafetai, Falealili alo ia i le saunoaga, see ese mai i lena mea o lea ua manino ma faamalamalama e le Malo, o la foi ua faamau e Olo mea uma ia e te fai mai ai.

**Tofa AUMUA ISAIA LAMEKO:** Faafetai i lau Afioga i le Fofoga Fetalai mo le avanoa. O le tausaga ua tuanai sa o matou talosagaina ai auala ia agai i mataaga turisi i Tafatafa, le mataaga lea o Moega ma le mataaga a Brenda. E faapea foi le mataaga o turisi i Vaiula ma le Maota o Maa. I le matou vaavaai i ai, o lo o i ai le auala, sa o matou talosagaina. Sa afio atu foi le Minisita Turisi fai le la matou asiasiga. Ae peitai ane, e maea ifo le asiasiga ua faamalulu mai le Afioga i le Minisita, e sese le Matagaluega lea sa asiasi. Ma lo matou talitonuga, e i ai lava le Matagaluega e feagai tonu

ma le vaega lea, o le Matagaluega o Galuega, ae le gata foi i lea o le Matagaluega o le Punaoa Faale-natura ma Siosiomaga. Sa o matou talosagaina le Ofisa o Turisi, e i ai le poloketi lea e i lalo o le Faalapotopotoga a le UNDP, mo le faaleleia o taligalu i gatai o Vaiula ma le Maota o Maa.

**FOFOGA FETALAI:** Ua maea le taimi o le sui usufono, faaiu mai le saunoaga.

**Tofa AUMUA ISAIA LAMEKO:** Lau Afioga i le Fofoga Fatalai, ua tele naua o matou auala e pei ona sa fuafuaina. O lea foi ua maea a matou talosaga mo ia auala. O le tasi o auala o le auala lea i Vaovai e tuaoi ai ma...sa fai ai le galuega a si o matou nuu. Sa tanuina le auala ina ia mafai ona feoai tagata agai i tai, o lea ua taatia foi i le Afioga i le Minisita i lea tulaga.

Lau Afioga i le Fofoga Fatalai, e fia fai sau faamatalaga i fuafuaga alualu mamao a le HRPP. I lou talitonuga, i le tausaga e 2003, sa faapena ona faatalanoa ai se tasi o fuafuaga alualu mamao e faaigoa o le Pacer Plus. O le Pacific Agreement on Closer Economic Relations. Ma o Matagaluega e 3 sa faafeagai ma nei feutagaiga. O le Matagaluega o le Va-i-Fafo ma Fefaatauaiga, Matagaluega a le Palemia, Matagaluega o Pisinisi ma Alamanuia ma Leipa. O lenei faatalatalanoaga sa fai ma atunuu o le Pasefika, ae le gata i lea, o Niu Sila ma Ausetalia ina ia mafai ona maua fesoasoani mo atinae o atunuu, mafai foi ona fai a tatou fefaatauaiga o oloa gaosi mo le aufaipisinisi. E faapena foi ona atinae mo le suiga o le tau. I le tausaga e 2006 sa faapena ona ....

**FOFOGA FETALAI:** Lau Afioga i le sui mamalu o e faafofoga mai ua ou fautuina e faaiu mai le saunoaga...

**Tofa AUMUA ISAIA LAMEKO:** Lau Afioga i le Fofoga Fatalai,

**FOFOGA FETALAI:** Se i tulai mai le Minisita o Galuega.

**Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese):** Faafetai mo le avanoa, e matau atu o le a faaiu le saunoaga a le sui usufono, ae na ona ou fia faailoa atu tulaga o galuega ia sa talosagaina. E i ai auala o le afioaga ua uma ona faatino, e pei o le auala i le aoga i Saleilua, auala ia ua toe faaopoopo mai, ua uma ona alu le asiasiga a le LTA, o lea ua faamauina e pei o le auala lea i Vaovai. E sao le saunoaga a le sui usufono ua matuai leaga lava auala ia. O lea na faamau, ma o lea e faagasolo atu ai galuega a le Malo, i auala ia ua tagai i ai le Pulega o Auala ina ia ave i ai se faamuamua. Ae leaga o lea lava e faagasolo galuega e le i taitai, o le tele ia o galuega lau Afioga i le Fofoga Fatalai. O lea lava e

tau fua atu i le seleni foi i lalo o le paketi a le LTA, ona e masalo lau Afioga ua molimauina foi ua toe aveese le isi vaega lea sa tele ai tupe maua. O lea ua ave i le Matagaluega o Leoleo le laiseneina o taavale ma le tulaga lena. O lea la e fua i le budget lea e aumai i le tausaga, ae pei o nai tupe ia sa fesoasoani i galuega faaopoopo, e le o sau i lalo o le paketi a le Pulega i le tausaga. Ae onosai mai, ua uma foi ona saunoa le Afioga i le Palemia, e le i fausiaina Roma i se aso e tasi. Ae o Afioga uma ia sui usufono lea na talosagaina auala, onosai ma faatalitali mai, o lea e faaasolo atu lava galuega a le Malo. E tusa ai foi ma tupe ia e maua e le LTA ma faasoasoa atu lava i galuega ia e matauina e ave i ai le faamuamua. Ma le faaaloalo lava lau Afioga.

**FOFOGA FETALAI:** Faafetai. O lena ua saunoa le Minisita o Galuega, o galuega uma e aafia i le Matagaluega o Galuega, e faapena ona faagasolo le latou fesoasoani atu i le atinaeina o itumalo e pei ona atugalu i ai le sui mamalu. Ae faaiu maia le saunoaga. E pei e malie le saunoa faalaauaitele i mea o le itumalo i lo le in details mai. Ona maua loa lea i le mea lena, o le fiu i auauai, uma o lona uiga e na o oe lava e te saunoa i lenei taimi e tau i le malologa. Se i fai fuafua mai a tatou saunoaga. Ia faaiu mai le saunoaga faamolemole.

**Tofa AUMUA ISAIA LAMEKO:** Lau Afioga i le Fofoga Fetalai, atonu o lea ua faaiuiu le lauga i lenei aso. Na o le pau lava si vaega lea sa ou taua ai le Pacer Plus lau Afioga i le Fofoga Fetalai, o galuega ia faavaitaimi. O le tuualalo i le Malo, atonu o le lumanaia ona toe faasafua mai lea, le fuafuaina ma le vaevaeina o le auina atu o tatou tagata i galuega faavaitaimi.

Ae le i seu lou vaa i fanua, o lau tatalo afai ua sala le gagana ma pao papa i lau faafogaga Samoa ma si ou itumalo o Falealili Nu 1, ua na o au o se auaua vaivai ma le faatauvaa. Ia malu ave i fale i o outou finagalo, alofa faamagalo se sese o le auaua. Falealili Nu 1 po o Falealili Sisifo. O lou tofi lea, na outou tuuina mai ia te au i le 2016, lea sa avea ai au ma outou sui. O lea ua ou toe tuuina atu e filitagaga ai si o tatou itumalo, i le faiga palota 2021.

O si o matou nuu o Sapunaoa, ou suafa matai o Leavasa ma Aumua, ma si ou matou nuu i Iliili ma Saleilua, suafa matai o Siiliili, aemaise le itumalo Falealili. O lau tatalo, pe ni a fa au i so outou finagalo, e moni ai upu o le tusi. Ae ou te le i fia faia se mea e tasi, pe a le to mai sau pule. Ina ne i pei o se mea ua ou faatauanauina lo outou agalelei mai, ae ia fai ma le loto. O galuega sa talosagaina ma savalia, o lena ua outou faafogaga. O lou igoa o lo o ou alu ai i le faiga palota i lenei tausaga, Aumua Siiliili Leavasa Isaia Lameko. O le valaaauina o le tagata o le valaaauina mai le Atua, o le tofiga lava lea mai le Atua, o Le ona le pule ma le malosi uma lava, aua upufai o Malo. Ia avea Iesu ma tautai o si o tatou atunu.

Lau Afioga i le Fofoga Fatalai, ia mamao ni aolealea i lau Afioga i le Fofoga Fatalai, ia maua pea lou malosi aua le Atua ma Lana galuega. Lau Afioga i le Palemia, Kapaneta faapea Minisita Lagolago, o outou mama na. Taliu mai foi i lenei itu i Afioga i Taitafono o Komiti Faapalemene aemaise sui usufono o le Maota, ia maua le malosi e faatino ai le valaauiina. Mo nai ou tama ua malolo manumalo mo le tofi faipule, ia..Lau Afioga i le Fofoga Fatalai, lau Afioga Leaupepetele Taimaaiono Toleafoa Faafisi, lau Afioga i le Minisita lau Afioga Tuitama Leao Dr. Talalelei Tuitama, lau fetalaiga Saleaula, lau tofa Faasootauloa Taulapapa Pati, lau Afioga Aeau Peniamina, lau Afioga Mulipola Laki, faamanuia le Atua i la outou tautua ma le loto faamaoni, faamanuia tele le Atua ia te outou.

Lau Afioga i le Fofoga Fatalai, e matua lagolagoina e lenei itumalo o Falealili Nu 1, le Tala Faatatauina o Tupe Faaopoopo (Nu 1) 2020/2021. Ia manuia si o matou itumalo, manuia Samoa aoao. Soifua.

*Na faailoa le agaga fiafia o le Palestene i le patipati o o latou aao ina ua maea le saunoaga a le sui usufono mo Falealili Sisifo.*

**FOFOGA FETALAI:** Ua faamalo faafetai saunoa ua faafogoa mai le itumalo, e naunau lava le sui mamalu ina ia faapena ona saunoa e faamanino ma faamalamalama atinae eseese i lea pitonuu ma lea pitonuu, mo le faamoemoe ina ia oo atu i ai le faasoa a le Malo. Ae ona o le tatou taimi e utiuti o lea lava ua outou faafogoa mai. E le gata i lea e le o taofia ai le tuualalo, ma le fesootai pea o lo outou sui i Afioga i Minisita ina ia faapena ona faagasolo ma faamau ia vaega o lo o faapena ona manaomia e atinae ai le itumalo. E momoli atu le faafetai i lau Afioga i le sui mamalu. Ona o le tatou taimi e faapena ona utiuti o le ala foi lena o le fesoasoani atu o le Nofoa. Ae faafetai i lou manatu mai i le Nofoa, e malu le Nofoa ona o a outou Afioga i sui mamalu.

Ia ua oo mai le faasologa, o la ua mumu mai le moli o le sui usufono mai Gagaifomauga Nu 2. Tulai mai lau Afioga i le sui mamalu e saunoa.

**Tofa SOOALO UMI FEO MENE (Gagaifomauga Nu 2):** E faafetai i lau Afioga i le Fofoga Fatalai mo le avanoa. Se i tau molimoli sua o palupaluga a lenei itumalo, aua le tapuaiga a le atunuu. O le tapuaiga a Samoa ma le tapuaiga a lenei foi itumalo. Ae a le fitaituga a lo tatou Malo i lenei 5 tausaga. Lau Afioga i le Fofoga Fatalai ma le mamalu o le Maota, e le taua se tautai matapalapala ae sili ona taua le ae o le faiva ma ai o le tai. O lagona na o lenei taeao, aua ua le o se foe na faatafea i le auau o peau, po o se lafo ua muli. O lea lava ua ala usu lau Afioga i le Fofoga Fatalai, ua e tu i fao ae laa i malaka, se i faasopo se ua. Ae se i faasopolia ai le tagutugutu ma le vanuvanu o le Maota o le Fonousu a Samoa. Ae a le tapuaiga mamalu a Samoa i ona tulaga faalupe, faafetai mo le taulaga tauosiosi. O lea ua tau

le taufaanuu ua to le fale o le tautai, tatou fale laia i le fale o le Atua. Aua o le fale e faatupu ai le filemu, ae le o maseiga. O le fale e fiafia i le lelei ae le o le sailiili masei, o le fale e punalia i le alofa. Ua afua ai ona tatou pale fiafia mai i lenei taeao i Lona alofa taumuamua ma Lona agalelei taumulimuli. Ia taalolo la le pule a le Atua, ae nuufaatini o tausala i ana auauna totofi, aua lo latou faiva tu'i lea. Ma ia tumau le viiga o le faamanu ma le faaneetaga i le Atua Pule Aoao, nei taeao ma e lua.

A o le tao foi a Samoa na velo i le lagi aua so tatou gafa i le Atua, o lea ua paia ma mamalu ai Tiafau nei.

Lau Afioga i le Fofoga Fetalai, e leai lava se toa na te toe tofi Samoa, aua e tau Toga ae tofi Samoa. Ua taoto foi ae o ai o feia ona tulaga masani. O le malae i Tiafau nei, e le toe fati ai se galu, pe toe olo ai se manu, aua o le malae o le faautugatagi ua atoa i ai paia, o sa o mamalu o Samoa i ona tulaga faalupe. E afua mai i Matia Matia Ituau, Finao ma Vaituutuu, tootoo o Fuifatu, Vailoa ma Faletoi aua Puleono i Salavai. O Maauga ma Nuuausala o Maauga ma Vaitoelau seia paia Lalogaufuafua, e tausi vaatele e Lufilufi aua Tumua.

Ona ou manatu lea, o le a tau faaofoofo tuagalu faatautai a le gataifale sua o palupaluga a lenei itumalo. Se i tau asaasa ai le ooootutu o le tai. Aua o lea ua faalepa sa folau o sui mamalu uma o lo o faavaotutui, i le Maota o tupu ma ee o le atunu, na fa'ia mai i le fuifui e sufi upufai o Malo. Ae leitioa foi see lilia Saveasiuleo, ae popole mulimaalao pe a tua ma ni a. Ioe, se ta te musu ne i utupisia lau tautala, ona teva lea o le nuu o imoa ae le i malu le fale na lau i le ula ae poupou i le toa. A o taeao foi faapenei, e ao lava ina silafia le lala tafue o ponati o laau, aua la tatou fesagaiga mamalu. O lea foi na saafi ai le tautai ma faatusa le soifua ma le ola, ua le ese ma le inafo fai mai sa ave e manu. A tuli ona sue lea i le foe ae apoapo i le tata, ae a oo ina taalii, ua taotoga iasa lo tatou taeao fesilasilafai, tulou tulou tulouna lava.

Ou te muai faatulou i lau Afioga i le Palemia ma lau Kapeneta, faatulou atu foi i lau Afioga i le Fofoga Fetalai. Afifio sui mamalu faalupe o le Palemene o Samoa. E faatalofa atu foi i Ofisa Sili o Pulega o Matagaluega ma Faalapotopotoga a lo tatou Malo. Ou te faatulou atu foi i le tapuaiga a Samoa, aua le alofaiva o lau Palemene i o latou faiva alofiaao se i sufi upufai o Malo ma sailimalo, aua Samoa o le atunu pele.

Tulouna la le afio o lau Afioga i Le Ao mamalu o le tatou Malo Tutoatasi, lau Afioga Tuimalealiifano Vaaletoa Sualauvi II ma lau masiofo. Afio lau Afioga i le Sui o le Fono o Sui Tofia ma lau masiofo, afio lau Afioga i le Faamasino Sili, le Peresetene o Alii ma Tamaitai o le Faamasinoga, aemaise le mamalu o le Faamasinoga.

E faatulou atu foi i le faafogafoga tapuai mai o ekalesia, Taitai o le ekalesia ma le au-Ositaaulaga, o suli ma feoi o le Talalelei. O lo o faapunapaulia ma faafalelemalu i itu malae e fia o le atunu. O lo outou faiva o le fautua tatalo, i so o se fatafitaaulaga ua manuia, ma toofilemu ai Samoa.

E faatulou ia Samoa ma lona vavaloloa, aua le paia i Tama ma Aiga o Aiga ma Tama, Aiga o Tupu, Aiga o Nofo, Aiga o Papa, Aiga o Ee ma Aiga na Tafaifa. Le mamalu ia Tumua Lufilufi ma Leulumoega, Tuisamau Aiga i le Tai ma le Vaa o Fonoti, aemaise tootoouli o le taupulega a Puleono i Salafai. E faatalofa atu foi i le faafogafoga tapuai mai a o tatou uso i le motu i Sasaē. Aua le susu o Sua ma le Vaifanua, o Fofo ma Aitulagi, Saole ma Saleaaumua ma le Launiu Saelua, Tama a le Manuatele, faapea tootoo o le Faleula ma le mamalu i le Faleagaafulu. E affio ai le Kovana Sili le Peresetene o le Senate, le Fofoga Fetalai ma Maota e lua. O ou paia na Samoa, e afua mai i le tai samasama o le Tuimanua, seia paia Fili ma Puletuu na tauilo ai manu o Malo. E fai mai na emo ai le uila laulelei i Mataniu Feagaimaleata, Faleu ma Utuagiagi, Malaeola ma Gafoaga. Ae suluia ai Samoa i ave malolosi o le Talalelei, ua fai nei ma Faavae papa o lo tatou Malo Tutoatasi. E pine i Tiafau, talatuu i Tiafau ua Faavae i le Atua Samoa. Ae taui ma apelepele e tu ma aganuu mamalu a Samoa. Ua le o toe i le faavaa, o lea ua ogatotonugalemu o le Faavae o le Malo Tutoatasi o Samoa. A o le taeao sili lena o lenei Paeaiga Lona XVI o le Palemene o Samoa. E faafetai i le Malo, faafetai i lenei Paeaiga i le loto tetele ma le totoa e fai ai suiga lelei, mo le manuia o le atunu. Lau Afioga i le Fofoga Fetalai, o upu a le fatupese Eperu, “Lou agaga e, ia faamanu atu ia Ieova, aua aua lava ne i galo se mea e tasi o ana meaalofa.”

Ua tuanai atu le amouta ma le amotai, ae tali le toe aso na i Moamoa. Sooalo toe foi i Safune ma Samauga, se i momoli lapalapaomalo, aua le tapuaiga a le itumalo. O le taulaga a le fafine mativa, ua pau o le mea ua muta ai lona malosi. A o upu foi na e masani ai lo tatou Falesafune, e le taua le sasau, ae taua le faatalitalimau. E le taua le tao ma le uatogi, e le taua foi le muaau faalele, ae sili ona taua i latou o lo o latou amoina le fata, o le tapuaiga. E tu’i le mulipapaga ma tatalo ina ia aua ne i tuavale faiva o le nuu.

E muamua lau faafetai i nai ou matua faale-Agaga i totonu o le itumalo i so o se fatafafaitaulaga. Sa e po le fala ma ula le faamatua o le magalafu, sa e tatala ou afeafe ma e talotalo i le lagi, ina ia aua nei auomala le folaua a lo outou atalii, aemaise o au tama fanau o lo o sailimalo mo le itumalo ma le atunu. O lau tatalo lena sa lagona ai le fiafia, sa lagona ai le malosi aemaise o le lototele e faaauau ai le valaauna sa outou tusi aao i ai.

E faafetai i le faatofalaiga i tupu o lo tatou itumalo, sa ou tiu ai faamatalaoa, ae sapi ai i le faautautaga alualu mamao a tootoouli a lo tatou falelua o Safune ma Samauga.

Si ou nuu o Fatuvalu, Faletagaloa ma Matavai, aua le affio o Tapaua ma Saausi, afio le Toa-fa o alii ma Tuumatavai faapea le susu o lau susuga i le alii o le nuu, lau susuga Leota. Alalatai foi le Toafia o Tama Tulafale ma lau Fetalaga i le Tuua Tugaga ma lo lua toalua.

Si ou nuu o Lefagaoalii Samauga ma Paia, le paia aua le affio o sao e fa, lau afioga i le nofo matua, lau afioga Tuu, lau afioga Fuimaono, lau afioga

Malaitai ma lau susuga i le Tuailemafua. Le nofo a usoalii ma le aiga sa Peseta, faapea Pagamalie, Mauaimaleuta ma le la itu o le tatou nuu. Laupue ma lau fetalaga le tuua Sooalo ma lau tamatane, ma lo outou faleupolu Samauga, faapea le mamalu o le aiga sa Peseta.

Le paia e o lou itumalo, malo le tapuai faafetai tatalo, e le mama pe laaloa le vaai i lau faaaloalo. O lau faaeaea ma lau pule na to mai, na ou folau ai i lenei 5 tausaga. Ou te ifo atu ma le agaga faamaualalo ma le faatauvaa i luma o le Atua aua po o ai le tagata ua e manatu ane ai. Ua e faaula, ua e faatiti, ua e faasei ma faapale. O lau pule lena, sao muao faalalelei i lou alofa faatina. Afai e galo oe, ia pipii ae lou laulaufaiva. O lea ua inu malie le aila i le vaitafe, ua matua taumafa foi i le suamalie o vai o le tatou Fale Gagaifoolemauga, ua malie le loto ma le agaga i le moni o lo outou alofa faamatua, e ala i lau tapuaiga ma lau faamanuiaga sautuafafafa i lenei 5 tausaga. O lea ua tuta ai i fanua le faamoemoe o lo outou atalii, a o le a sa matou tu tali atu i lea faaaloalo maualuga. Ou te asu atu vaimalu i lo outou finagalo, o le a se tau asuas o le tautua ua oo i ai le malosi, ma se auaunaga ua le lava i lenei 5 tausaga. Ia fale ia i le Fale o le Atua lo outou finagalo. Ae sa momoo lava faalupe o naumati, ia lolou mai le vao ma faaae mai le sami, ua pelega ona o le valevale alofa i lau tapuaiga.

Ou te faamalulu atu foi i si ou itumalo, e leai lava se faiva e asa ma se maumau, o le a se pati ua sala po o se aga ua le tautamalii i le tauaveina o le mamalu o le itumalo, e poto le tautai ae pisi le sami. E leai foi se tama taalo na te iloa sona sese, ona ou faamoemoe atu lea, aua o oe o le matua faitama e magalo ai se faaletonu o le atalii.

Si ou itumalo pele, o toe upu a la outou auauna, ua malie le faaaloalo, ua taia i le vaai ua faamalieina le vaai, ua taia i le faalogo ua faamalieina le faalogo. Ua taia le papa i tau ua malie le faatolotologatama. Ua malie le ululogologo i le palesoo. Ua titi manu ua lava manu, ua fata luga ua fata lalo i lou alofa ma lou agalelei. Ona ou manatua lea o aso anamua, fai mai, a o le i oo mai le Talalelei i Samoa, ua leva lava ona i ai tapuaiga a Samoa i aso ia. Atonu o le mea foi lea, na ala ai ona faigofie ona talia le Talalelei. E fai mai a oo ina sii se faiva i le tai po o se faiva i le vao, e i ai lava le tapuaiga a Samoa, e i ai lona fale tapuai. A oo foi ina sii se faagatama, e i ai foi lana fale tapuai. Ae a oo la ina ae manuia se faiva po o se faatamasoaliiga, ona usu lea o le pese a le tapuaiga. “Ua faafetai, ua faafetai, ua malie mata e vaai. Ua tasi lava oe, ua tasi lava oe, i lou nei faamoemoe.”

O le faafetai faaleauau lena si ou itumalo, ma lau tagiau i le Atua, ia matale lagia ma auai atu ana faamanuiaga. I le paia o tupu o le itumalo ma tootoo o le tatou falelua, faletua ma tausi saoao ma aualuma ma le malosi o le itumalo. Ia mana le tatalo ma le upu folafola a le au ositaulaga e sema ai ni manu, mo le itumalo ma Samoa. Ma ia tumau pea le la o le nofo fealofani i lo tatou falelua Safune ma Samauga.

Lau Afioga i le Fofoga Fatalai, a tu ma tepa i tua i la tatou folauga faaumiumi i lenei 5 tausaga, ua le ese ma le malaga a le nuu o le Atua, i le vao i le 40 tausaga. Fai mai sa folau i le ao e agi faaniutu i le pogisa. O le ao e agi faaniutu i le malamalama, o le Pule Tutasi lena a le Atua. E pei o le matagi e agi e le moe, le Pule foi lena a le Atua, sa mamao ai mala ma puapuaga, ae malutia Samoa i Ona aao alofa, e aunoa ma se faaluafesasi. E ui ina lofia le lalolagi i lenei faamai matautia ma ua tele le soifua ua maumau ai, ae a Samoa? O lea ua tatou laulua fesilafia i tai o lomalomae ae le o tai o soua. O tai o Atoa ae le o tai o Fagaloa, o lea foi ua tatou avatuli, ma avafatafata i ataata o Taulelei ae le o ataata o Fusia.

E faafetai i lo tatou Malo i le mataalia ma le mataala, aemaise i latou uma sa tofu sao ma ositaulaga i le puipuiga o Samoa mai lenei faamai matautia. Faitau so outou ai a o lo o faatalitali le lagi.

Faafetai i lau Afioga i le Palemia ma lau Kabeneta mo galuega lelei sa faatino i lenei 5 tausaga o le a maea o lenei Paeaiga, e le gata i lenei itumalo, a o le lavaloa o Samoa i ona tafa e fia. O lau mau tauave foi lena, o le lauga sili ona leotele, o galuega e tino mai mo le manuia o tagata uma o Samoa. Ae fai mai foi si toeaina o Oka, “E faapefea ona alofa i le Atua e le vaaia e mata ma le tagata e taia i le vaai ae le alofa i ai?” Faafetai tele i lo tatou Malo ua maea ona faatino nisi o talosaga a lenei itumalo sa tuuina atu i lenei Paeaiga, e ala i ana auala galue, faaleleia o le suavai, aemaise foi o le faaleleia o le auaunaga tau eletise. O si o matou Fale Gagafoolemauga e tele atu taimi e pe ai le vai nai lo taimi e ola ai. Ae faafetai i le Malo e i ai nuu o lenei itumalo ua ola e 24 itula.

Faafetai i lau faamuamua i aoaoga ma le soifua maloloina. E taia pea i le vaai ma le faalogo le fausiaina o faleaoga ma le faaleleia o maota gasegase i afioaga i tua ina ia lelei lona siosiomaga, aemaise o lona anofale ina ia uunaia pea le faaleleia ma le siitia o auaunaga tau aoaoga ma le soifua maloloina, e le gata i lenei itumalo ae o le loaloa o le atunu. O ni fuafuaga lelei tele lenei e liolio i ai so o se Malo, aua a atamamai ma soifua maloloina ni tagatanuu o se atunu, e le taumate o le a siitia le tulaga maualalo o lo o soifua ai nai aiga, o le a manuia ai nuu, aemaise le galuega pele a le Atua. A o le latou sao tele foi lena i le faatupulaia o le tatou tamaoaiga. Na pau foi lea o le atinae lau Afioga i le Fofoga Fatalai, e le mafai le mafai e le maemaea ma le taufaamatau o mala faalenatura ona lepeti. Ai lava se i vagana le pule a le Atua. Femolimauai si o matou motu i Salafai i le taua o le matou auala sima uamea i Samalaeulu, ua au tausaga, ua autupulaga o fai lenei pologa. O lea ua ea le igafo ua leva ona magoto, faafetai i lau pule ma lau faaaloalo ua to mo Salafai.

Faafetai mo auala mai Patamea seia paia Vaiaata ma Fusi, o le a faafaigofie ma vave ai femalagaaiga i le agai atu i le la itu, i si o matou Itu o Tane ma le agai atu i le Itu Asau, ae faalaolao nai nuu matafaga i le atu Amoa mo nisi

atinae talafeagai tau tagata tafafao maimoa mai fafo e uunaia ai pea le tamaoaiga o si o tatou atunuu.

Lau Afioga i le Fofoga Fatalai, e momoli atu le agaga faafetai aemaise lau Afioga i le Taitai o le Malo mo nei galuega tetele sa faatino. E oo lava i le nuu o le Atua sa vaaitino ma molimau i le Silisili Ese o vavega tetele na faia e le Atua i le vao i le 40 tausaga, ae le i mau ai le faatuatua o le nuu. E tele tagata sa folau faa-ia o tainefu le latou vaai, o le taimi ua talitonu o le taimi ua le mautonu. E faapena foi le tatou folauga, e ui i le tele o galuega lelei sa faatino, ae lagona lava le leo paulua, o le taimi ua malu le agi a le toelau, o le taimi foi ua faatautau le agi a le matagivale. A o uiga na o le soifuaga, e i ai taimi e faitau eseese ai Tutuila ma Ape, a o le tatalo a lenei itumalo, ia mau le toovae, ia onosai ma lototele ma ia aua ne i fati le alofa e faatautai ai le folauga a Samoa, aua o oe o le lafogaseuga o le Maota lenei. O mea lelei, o mea feololo lona lelei ma mea matua le lelei e faaee uma atu i lau Afioga. Ia faamanuia le Atua i lou valaaunuia.

E fia momoli foi le faafetai faapitoa ma le faamalo i le pulega mamalu a alii ma faipule i la outou fesoasoani ma lo outou sao taua, i le tatou Malo, i le sailiga o le filemu ma le tausiga o le nofo lelei i totonusi o afioaga ma alaalafaga. Faafetai i le Malo, o lea ua to lo outou matupalapala, ua amanaia ai lo outou sao taua aemaise lava i au faiga filifiliga ma faiga faaiuga mo le manuia lautele o afioaga ma alaalafaga, aemaise o le atunuu.

Faafetai i sui usufono uma o le Maota, malo le pale, malo le tautai, faafetai i lau tofa saili ma lau tofa fatalai sa faavae ai au faiga filifiliga ma au faiga faaiuga aua le fauina ma le pasiaina o Tulafono. E tele taimi tatou te faitau eseese ai, ae tasi lava le faafitiga o aleaga, se i fusi le fau o malo ma sufi lo tatou valevale alofa mo Samoa si o tatou atunuu pele. Ua talatuu lenei Paeaiga ina ua maea ona pasia le tele o Tulafono taua e siitia ai lo tatou tamaoaiga, e puipuia ai lo tatou siosiomaga mai le malolosi o suiga o le tau ona o le ola soonafai o tagata. E puipuia ai le saogalemu ma le nofo lelei o le atunuu ma siitia ai le faataua i tu ma aganuu mamalu a Samoa, o lo tatou tofi mai le Atua. Faafetai i le moni o lo outou alofa ia Samoa.

**FOFOGA FETALAI:** Toe 5 minute o le sui usufono.

**Tofa SOOALO UMI FEO MENE:** O le upu e fai i vai o le matou fale Gagaifomauga, a e tofo e magalo, a e matua taumafa i ai e suamalie ma malie ai le loto. Lau Afioga i le Fofoga Fatalai, ua le taumafa tofotofo, ua matua taumafa ma le malie eleele o Samoa i lau tautuaupu, faafetai i lau tofa faatoeaina sa apelepele ai le Maota. A fisaga le matagi ona sala lea o ou la-afa ae tiu i ou la-fala. A lataluta le folauga a le Maota ona sala le o ou la-fala ae tiu i ou la-afa, a o lau fua taualuga, o le faaaloalo ma le vatapuia e tausia ai le va lelei i tagata, e leai lava se isi, leai lava se sui usufono mamalu sa e faatulaia i lenei 5 tausaga. O lau tofa poto lena, o lau tofa faautauta lena e

tausi ai mamalu o le Maota ae saili ai malo aua le tapuaiga a Samoa. Viia le Atua i galuega lelei ua e faia mo Samoa.

E le itiiti foi le agaga faafetai i Ofisa Sili o Pulega o Matagaluega ma Faalapotopotoga a le Malo, aemaise le aufaigaluega uma a le Malo. Fai mai Paulo i lona atalii faaleagaga o Timoteo, "Ia e tau atu i le nuu, o le ua faamafola lona lima i le ua mafatia ma tigaina ma moomia le fesoasoani, o taulaga na fai mai e matua fiafia i ai le Atua." A o le Atua foi na te toe taui atu e tusa ma lena agalelei, malo le tautua atunuu, faafetai faitaulaga mo Samoa. Fai fiafia laia o lau tautua mo Samoa, aua le tautua fia matai, aua foi ne i nanau le manao i se taui. Aua ua tautala manino le aposetolo o Paulo, "E i ai le taimi e i ai le aso e toe taui ai e le Atua lou alofa ma lou agalelei, e ala i lou faamaoni i lou valaauna.

Lau Afioga i le Minisita o Tupe ma le Matagaluega, e le tau laeia pe taufaafuluina lenei Tala o le Tupe i sa matou tala. E 5 tausaga o tatou folau mai i puapuaga ma faigata e filia ai le folauga, ae malo le tautua atunuu, e le iloa se tautai matapalapala i le malu, e iloa pe a pusa le aau. Ua matou molimauina le tele o le agai pea i luma ma le tulaga lelei o i ai lo tatou tamaoaiga i lenei 5 tausaga pe a fua i le faaletonu ma le pagatia o lo o i ai le tamaoaiga o le lalolagi.

Lau Afioga i le Fofoga Fetalai, o taiala na ma faavae lea foi e limataitaiina ai le tatou Tala o le Tupe, e matua lagolagoina e lenei itumalo.

Lau Afioga i le Fofoga Fetalai, o nai saafiafiga na ma moomooga na faalupe o naumati o lenei itumalo, ae ou te faamalulu atu i le Maota faapea le tapuaiga a Samoa, e leai se tautai atoatu e atoa ni i'a o lona faiva, o le faiva o lima tautala, o si ota lima foi e paia ai si ota mata. Afai ua sala le vaogagana, ia sala ia ia Vala o le upu e fai i si o matou nuu i Paia, ae apoapoiliu o oe o le tautai matapalapala. Aua le tuufau ne i gapa le toa, ae le gapapa le fau. Faamagalo le leo o Safune ma Samauga.

Ona faapea lea o se leo vaivai o lenei itumalo, o le a seu le vaa o Safune i Taoa ma Samauga i Faletagaloa ma Lalokava o tua o Finao. Ou te tafao ma matatoaga, ae aumaia le filemu ma le alofa o le Atua Silisili Ese e faalava tapui ai lo tatou taeao mamalu. Ia manuia tele lau tapuaiga Samoa i le mamalu o sui usufono uma o le Palemene. Ua faapopo nei ni aso ua a ua le tuua asofolau, ma ua laolao magoto foi le mafuaalii sa tautai taofi taumuli aua tofi ma tiute sa alofaiva i ai aua si o tatou atunuu. Ua ifo muao foi le taulaumea ma loifofoga ona o mafutaga sa pele ma mamae, ona ou manatu lea, auliuli sau se taimi tatou taumavae, ae aumaia le mafutaga lauiloa o le Tusi Paia, lea na faapea ane ai Ionatana ia Tavita, "Tavita, o le masina faatoa vaaia i le aso a taeao o le a ou le nofoia lou nofoa, o au foi o le a ou fana atu ni u faapei o se manulauti. Afai ou te fai atu i le taulealea e momoe ma ao mai u o lo o i ou tala mai, ona e foi mai lea, o le a manuia oe, e leai lava se mea e tupu, ua soifua le Alii. Ae afai ou te fai atu i le tama, faauta, o u o lo

o i ou talaatu, ona e faaauau lea ma le manuia, ua auina atu oe e le Alii, ae ia tu pea Ieova i lo tatou va.” Ua faapena se lagona.

Le paia e o le Maota, e i ai sui usufono o le a malolo manumalo e le toe foi mai. Afai foi e maea le faiga filifiliga a le atunu, po o ai lava o i tatou o le a le toe foi mai, ia faaauau le malaga faatasi ma faamanuiaga a le Atua, ua ia te oe le Alii i so o se valaauna o le a totofi i ai lo outou soifua ma lo matou ola. Ae afai o le a toe foi mai, o ai o le a toe foi mai, o outou mama na, ma ia sagai ane ai o le tai e faafulu le tofa saili ma le tofa fetalai e fai ai filifiliga tonu ma le faamaoni, aua ma le faaituau. Ia sosoo le fau ma le fau, aua le palaai ma ia toa le loto e fai suiga lelei mo le manuia o Samoa, ia ola Samoa i lou alofa, ma ia tu pea Ieova i lo tatou va, nei seja oo i le faavavau. Soifua ma ia manuia le Fonousu a Samoa.

*Na faaalia le agaga fiafia o le Palemene i le patipati o latou aao i le maea ai o le saunoaga a le sui usufono mo Gagaifomauga Nu.2.*

**FOFOGA FETALAI:** Ia, e le tau faafuluina le toga lelei e pei ona malele ma saunoa le sui usufono mamalu mo Gagaifomauga Nu.2., e le tau faasili foi se upu a le Fofoga Fetalai ou te faafuluina pe selu atu, ae na ona ou faapea atu, amuia oe Gagaifomauga Nu.2 ua e faitama i se sui usufono e tulai mai. Ia, o lea lava ua outou faafogfa, e pei lava o moomooga foi nei o le tamaitai o Seepa ia Solomona. Ioe, e itiiti mea sa ou faalogo i ai i mea ua ou vaaia i lenei taeao ma lenei aso.

O le mea la lea, o le matou foi lea tatalo ia alofagia e le Atua o fea e iu i ai faiga filifiliga a lou itumalo, ia, ou te manatu e le lilo le silafaga a le Atua i lou tulai mai e tauave le itumalo e ala i upufai o Malo. Ia, faamoemoe i le Atua e faapena.

Ia, ua faamalieina le faafogfa a le Palemene, ua ou manatu e faapea foi le faafogfa mai a Samoa, aemaise o lou itumalo i le saunoaga matagofie ua taoto i luma o le Fonotaga a le Palemene i lenei taeao. Faafetai, ia maua pea lou malosi, faamoemoe i le Atua mea uma. Ia, ua ou manatu ona o lea ua tatou taunu i le tatou malologa masani, ia o le a faataatiae Galuega a le Fono Aoao mo lana malologa masani.

*Na faataatiae Taulumaga a le Fono Aoao mo lana malologa masani i le itula e 10:40 i le taeao ma toe faaauau i le itula e 11:30 i le taeao.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.*

**FOFOGA FETALAI:** Ou te faasila sila atu ua toe amatalia Taualumaga ma Galuega a le Fono Aoao Faitulafono.

Malo le onosai malo foi le tauatai i le faatinoga o le tatou galuega. Ia, ua avanoa lumamea nei i le Palemene mo se sui usufono e fia tulai mai e saunoa.

Ia, tulai mai le sui usufono, e tatala foi le avanoa i le Komiti o Tupe vagana le Taitafono ma le Sui Taitafono. Ia, se i tulai mai le Afioga i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ona o lea ua vaai atu foi o le aso puupuu lenei, a ua i ai le isi tulaga fou matagofie lea ua tulai mai i totonu o le tatou Maota, o le alu alu ma tatou fai pesega. Ia pe a tuai foi ona fai lauga, sau pese.

**FOFOGA FETALAI:** Malo faafetai. Ia pe muamua foi le pese ae mulimuli le lauga. Malo faafetai.

Ia tulai mai le sui usufono mo Vaisigano Nu.2, le Afioga ia Tapulesatele Mauteni.

**Afioga TAPULESATELE MAUTENI TAMASONE METULI II ESERA (Vaisigano Nu.2):** E i ai le manatu ua sao i alo le faasiliga malosi i lenei aso i le Palemene a Samoa. E malie foi le faalogologo atu i le saunoaga a le Palemia, ae paga lea, e le lava se tomai foi mo le tulaga lea, leaga a ou pese, e tasi lava le pese ou te iloa, na o le pese foi lea sa ou taua muamua, o le faafetai i le Atua, e pei na o le pau lena o le pese.

E faafeiloai atu i lau Afioga i le Fofoga Fetalai, e faatalofa atu i lena itu i le Fonousu a Samoa i lau Afioga i le Palemia, Afioga i Minisita faapea foi Minisita Lagolago. I lenei foi Itu i afioga i Taitafono o Komiti Fa-Palemene faapea foi alii ma tamaitai sui usufono.

E faafeiloai atu i le Ofisa o le Fono i le Failautusi ma le Pulega.

E faatalofa atu foi i lau Afioga i le Faamasino Sili, le Afioga i le Peresetene, le Afioga i le Sui Faamasino Sili, alii ma tamaitai Faamasino faapea le Ofisa Sili o Pulega ma le Matagaluega o Faamasinoga.

E faatalofa atu i lau tapuaiga Samoa, mai lava i mauga tetele seia paia mauga iti. E faafeiloai atu ai i lau Afioga i Le Ao o le Malo ma lau Masiofo, le Sui o le Fono a Sui Tofia ma lau Masiofo. Le paia i Tama ma o latou Aiga, o Aiga foi ma latou Tama, Aiga o Tupu, Aiga o Nofo, Aiga o Papa, Aiga na Tafaifa.

Le paia ia Tumua ma Pule, Ituau ma Alataua, Aiga i le Tai ma le Vaa o Fonoti.

E faatalofa atu foi i le faafogagaaga a le motu tele i Sasae i lau Afioga i le Fofoga Fetalai. O le agaga faafetai e faafeiloai atu ai i le Aufaigluega Paia a

le Atua o lo o faanonomanu i fatafitaaulaga e fia aua lava se manuia mo Samoa.

E faatalofa atu foi i Ofisa Sili o Pulega o Matagaluega ma Faalapotopotoga faapea foi le loaloa o lo o sasao nei.

E avea foi lenei avanoa e faafeiloai atu ai i le tapuaiga a si ou itumalo o Vaisigano Nu.2 i ou nuu o Papa, Vaivaimuli ma Fagasa, tainane nai aiga i Samoa nei ma atunu e mamao.

Lau Afioga i le Fofoga Fetalai, faafetai ua tatou aulia lenei tausaga fou. E moni lava ua faaiui lenei masina muamua, ae tatou te matauina lava le alofa o lo tatou Tama i le Lagi, ona o lo o saogalemu mai pea i tatou i nai faamai, aemaise o fesuisuiaiga matuia o le siosiomaga, e pei ona aafia ai le lalolagi. Ma e ui lava ina i ai lana valaau paia i nai o tatou aiga, aemaise foi o nisi o tamalii sa tautua i le Maota nei, ae faasaoina pea i tatou i Lona agalelei.

Lau Afioga i le Fofoga Fetalai, a o le i faailoa atu ni nai manatu laiti i lenei Tala Faatatau Faaopoopo (Nu.1) o le Tupe 2020/2021, ou te faaaogaina lenei avanoa e momoli atu ai le faamalo ma le faafetai i le Malo, le Palemia ma le Kapeneta i galuega maeaea e pei ona faatino e le Minisita o Tupe, le Pulega foi ma le Matagaluega i le faasoasoaina lelei o le tamaoaiga aua le atiaeina o si o tatou atunu i le galulue faatasi ai lea ma Matagaluega ma Faalapotopotoga uma a le Malo, ma e uma na lagolago ma fesoasoani i tapenaga pei ona faatinoina i lenei foi 5 tausaga ua lamalama faaiu. E faafetaia lava le galuega soosootauau a Matagaluega ma Faalapotopotoga uma o le Malo. Ae avea ai au e fai ma sui o si o matou itumalo e faafetaia ai e le gata i nai atinae faatino mo lo matou itumalo, aemaise foi o atinae faatino i si o tatou atunu atoa.

Lau Afioga i le Fofoga Fetalai, e amata atu faapea se faamatalaga, e toe faafetaia lava le Malo e auala atu i le Minisita o Galuega ma le Pulega o le Suavai mo le atinae po o le eliina foi o le suavai taumafa magalo ma lona faasoasoaina e pei ona i ai i Sataua. Ua faaaogaina nei lea faamanuiaga e le tele o aiga i Sataua ma Fagasa, faapea foi ma nisi nuu o si o matou itumalo i le Itu Asau.

Ae tatalo atu pea i lau Afioga i le Minisita, po o le Ofisa Sili o Pulega o le Suavai, e pei lava ona toe manatu atu i nai tusi foi na faaoo atu i le amataga o lenei masina ina ia silasila ane pea lau Afioga i le Minisita ona o nai aiga lea i le agai atu i Sisifo i le pamuvai magalo lea, e le tele tele ni aiga, ae pei e toe talosaga atu lava, ae pe faapea foi ua uma o le a tau faamaea lenei Paeaiga ona faapea lea e uma ai galuega, ae toe taumafai atu ia alofa e faatino le tulaga lea, aua a faataunuina lea fuafuaga, e tele lava foi le aoga, aua e mafai ona taumamafa ai ma faaaogaina i le suavai magalo lea i le falemai o le itumalo ona o le tulaga o lo o i ai. E tele lava foi nai faafitauli sa i ai talu ai nei, ae pei o le agaga lea e toe tatalo atu ai pea i lau Afioga i le Minisita e toe silasila ane lava i le tulaga lea.

E avea foi lenei avanoa e toe talosaga atu ai i le Minisita ma le Ofisa Sili o Pulega o le Pulega o Suavai faapea foi Felauaiga i le Laueleele, i le tulaga lea i si o matou... e le faapea foi na o nai o matou nuu, e faaaoga e le Malo, i le itu mai lea i Sasae o le pamuvai lea. E moomia lava le toe faataina o le auala. A silasila i ai ua faaletonu foi nei auala, ae tatalo atu pea, se i silasila ane i ai.

O le isi tulaga lau Afioga i le Minisita, e toe talosaga atu i le isi lea auala i Sataua, e lelei lava le taulogologo atu pea. O lenei foi auala o se auala ua leva ona taumafai mai i tausaga e tele ua tuanai atu, ia, ona o se auala lava o lo o faaaogaina e le tele o nai aiga o si o matou nuu lea i Sataua, i le faatinoina o faatoaga. O lenei auala e amata mai lava i le alatele o le Malo faasolo atu i le mea lea e i ai pou telefoni foi ia a nai kamupani ia, faasolo atu i uta i le mea foi o galulue ai le toatele foi o si o matou nuu. E pei o le tulaga lea e toe tatalo atu ai, silasila pea i ai, leaga e aoga ona o le tele o aiga o lo o i ai, e amata atu i tai, ae o le tele ia o faatoaga i le agai lea i uta i le auala lea.

Ou te avea foi lenei avanoa e toe faafetai atu ai i le Malo i le tulaga lea ua manuia ai si o matou nuu i Fagasa i le auala sa fausia ma faataina, ua talitonu lava si o matou itumalo foi o faaaogaina lenei auala, o le matua aoga lava ona o i foi e amata atu ai le agai i uta i nai faatoaga.

E faafetaia foi ia le fesoasoani a si o tatou Malo, le tulaga lea i o tatou moli auala, e toe tatalo atu ai i lau Afioga i le Minisita ma le Ofisa Sili o Faalapotopotoga tau Eletise, mo nisi foi moli. E moni lava e aoga moli foi lea i tai i le aai, leaga ua tele foi ia nai aiga o lenei itumalo e pei ua agai foi lea i uta ia nai aiga. Ua alala ai foi ma nonofa ai, ia e le o se talosaga fou foi lenei talosaga. Sa outou ui ane foi i le faaiuga... i le tatou Ofisa i Savaii, ia o le tulaga lava lena. O le pogisa ia, aua o le talanoa lava lea o le tatou Malo i le tulaga lea i moli ia, e pei e silasila i le aai ma le auala lea i le main road. Ia e tele lava nai aiga foi lea ona o le tulaga lava lea ua agai i uta, ae o le manaomia ia o nei moli mo le pogisa foi lea i le soifua saogalemu foi lea o aiga. E pei o le tulaga lea e toe tatalo atu ai pea. Se i silasila ane i ai...

**Susuga Hon Papaliitele Niko Lee Hang:** Lau Afioga i le Fofoga Fatalai...

**FOFOGA FETALAI:** Ia, malie le sui usufono o Vaisigano Nu.2. se i tulai mai ia le Minisita o Galuega.

**Susuga Hon Papaliitele Niko Lee Hang:** Faafetai mo le avanoa i lau Afioga, tasi lea mataupu e masani ona lagalaga mai e Afioga i sui usufono mamalu o le Palemene o poumolii ia o le auala. Ma ou te tali lava i ai e i ai Faiga Faavae a le Malo. E aumai le talosaga tusitusia a le afioaga, saini mai ai Alii ma Faipule i tulaga ia o afioaga e manaomia ni moli auala.

E aumai le talosaga ona o atu lea o le Pule o le EPC e fai ia le survey ona tuuina mai lea i le Komiti foi lea e vaia galuega ia mo le CDC, galuega foi

ia e fesoasoani i communities i afioaga taitasi. O le Faiga Faavae la lena, e tatau ona uia ma faamaliina, ina ia aumai talosaga tusitusia, ma tau mai i le talosaga ia vaega o le afioaga lea e manaomia ia moli ia, ae saini mai ai ia Alii ma Faipule o le afioaga, ma lou faaaloalo lava.

**FOFOGA FETALAI:** Malo, tulai mai ia le sui usufono e faaauau ia le saunoaga e le o toe umi foi se taimi.

**Afioga TAPULESATELE MAUTENI TAMASONE METULI II ESERA:** Faafetai i lau Afioga i le Fofoga Fetalai, faafetai i lau Afioga i le Minisita, e pei o tulaga na. Masalo a silafia lelei le tusi foi sa avatu i le amataga, e pei sa upuia ai foi si o matou itumalo, ona ua avatu le lisi e pei o lisi foi ia o tusigaigoa le toatele o moli sa manaomia. Ae e pei o le tulaga lena sa toe savalia lava ona o le tali tali mai. Alolofa e toe avatu nisi moli.

E avea foi lenei avanoa e toe momoli atu ai le faamalo i lo tatou Malo ma le galuega lava a le Minisita foi ma le Ofisa Sili o Felauaiga i le Lauelee. Faafetai foi o la ua uma ona faatinoina foi le tanuina ma le faalaugatasia o le isi a matou auala lea i Papa. O le tulaga foi e pei ona silafia e lau Afioga o lea e i ai le fuafuaga foi lea a le Malo e faata le auala lea, ae faafetai mo lenei taimi foi lea na ona faafaigofie ae tele foi e o lo o nonofo ai ma agai i uta i faatoaga. E faamalo lava i galuega lelei faatino mo nai o tatou tagata.

Lau Afioga i le Fofoga Fetalai, e faaalia foi le agaga faafetai i le Minisita o le Matagaluega o Aoga le Ofisa Sili foi. E toe faaleo atu ai faamanuiaga na maua e si o matou nuu i Papa i lo matou Tulagalua i le fesoasoani foi a se tasi o tatou paaga i le tatou Malo o Iapani. O lenei atinae ua faatauaina lava e si o matou nuu, ia aua lava le faamautuina le ola aoaoina a nai fanau. Ae avea lenei avanoa e toe tatalo atu ai i tou Afioga foi i Minisita ma Pule Sili i tulaga lava lea i faiaoga. Ou te iloa la e tele lava nai isi faiaoga foi lea e taumafai e maua atu se isi faiaoga i lo matou aoga leaga o le tulaga lava lena o le tele foi o na tausaga ua tuanai atu nei e toa 3 faiaoga ae 8 vasega.

O le... e pei foi lea e i ai lava si a matou silasila foi i se isi tamalii i Papa ua matua foi si alii ae lea e fai lava ma tauanau e pei ona tatalo mai e toe faaaoga lona tomai foi lea e fesoasoani ai. Ia e pei o ia lena e fai foi ma tua i ai ae talosia ia maua ni nai faiaoga. O lea foi ua amata tatou aoga i lenei tausaga.

Lau Afioga i le Fofoga o le Fono, e faaleo foi se faafetai i lo tatou Malo e ala atu i le Minisita o Faatoaga ma Faigafaiva faapea foi Ofisa Sili ma le Pulega. E faafetai e matauina lava le lelei faatino o galuega i tulaga lea o le faafaileleina o nai a tatou meatoto. Ia aua e i ai lava le talitonuga e i ai foi taimi e pei ona tatou i ai i le faamai, ia o le isi lea tulaga e pei foi lea e faigofie ona agai e fai ia nai faatoaga, toto nai meatoto.

E faafetai i lea tulaga foi i le tou faatinoga, ae e toe faamanatu atu i lau Afioga i le Minisita ma le Ofisa Sili e pei foi ona tusi atu i nai meatoto, i nai

koko ma nai niu ua manaomia lava nai mea toto o lo o i ai nai atinae o fuafua. O lea la e tali tali atu...

**Tofa Hon Lopao Natanielu Mua (Minisita mo Faatoaga ma Faigafaiva):** Lau Afioga i le Fofoga Fetalai...

**FOFOGA FETALAI:** Ia se i tulai mai ia le Minisita o Faatoaga...

**Tofa Hon Lopao Natanielu Mua:** O lea e tau fai atu muamua se fautuaga i le Afioga i le sui usufono mamalu e tau leotele o la e fia faafogaga mai Lealuga ma le Falefa o Taua i lona siufofoga matagofie. Ae e na ona ou faamanatu atu o lea ua uma ona tufa la tatou lisi o mea toto sa talosagaina. O lo o tele lava ia le tatou laau o la e i Asau i le tatou station la e i Asau e pei ona... o le koko, o le avoka ae o le tulaga i le tiapula foi la ua uma ona faasoa atu.

Na muamua lava le afioaga talu ai le faatigaulu mai o le afioga i le sui usufono mamalu i tiapula o le latou itumalo lea na soona fai ai foi au e sui o le FAST o le aualii saosaoa foi ia i o fai mai ua tufa muamua i lou afioaga. Ia ae e leai, o le isi mea nei pea o faafogaga mai ia lou itumalo le talosaga foi lea na aumai e lou itumalo i se ramp, o lea ua uma ona fua, lea ua tali atu o le a faatino, ae na manao e faatino i le vaiaso lea na talu atu nei ae ou taofia se i uma ane le palota se i toe sau ona ae o la ua uma ona fuafua lea ua i ai le seleni lea na pasia e pei ona faafogaga foi i le fono o le Komiti o Atinae a le Malo lea na faasalalau ai tulaga na.

E oo foi i le ice machine o le itumalo e aafia ai aemaise o le tou nuu e tele vaafagota, ia o lena ua faatino atu ia tulaga faapena i le talosaga mai a lau Afioga ma le tou Komiti, ne i te i ua e toe taua mea na ae lea ua ou taua mo oe lau Afioga. E pei lou tau atua ou te leotele atu o la e faalogo mai ia lou itumalo pei e tau le lagona mai ia lou siufofoga ma le faaaloalo.

**FOFOGA FETALAI:** Ia se i...

**Afioga Hon Loau Sola Keneti Sio (Minisita mo Aoga, Taaloga ma Aganuu):** Lau Afioga i le Fofoga Fetalai...

**FOFOGA FETALAI:** Onosai lava le sui usufono mo Vaisigano Nu.2 se i tulai mai le Minisita o Aoga.

**Afioga Hon Loau Sola Keneti Sio:** Ia, leai ua ou tulai atu lau Afioga i le Fofoga Fetalai ona o lea sa taua foi ia le matou Matagaluega ae sa ou le faalavelaveina lava le lauga matagofie a le sui usufono. Na ona ou manatu e tali i lona aotelega, ui o lea o lea ua maua si avanoa lea ne i te i foi ua toe

lauga ai se isi sui usufono i le le lava o a tatou faiaoga ia ma le fetuunaiga o faiaoga.

O le taimi nei o lo o faagasolo le posting ia ma iu mai foi a tatou fanau mai i le Iunivesite ona faapena foi lea ona tufatufa i tua i aoga ina ia faatofusia. Ia e matau foi, e le alu i lalo o le Primary level lava ia o lea e alu i le 1 i le 8. Ia e le faapea la a toa 70 tamaiti ona 1 lava lea i le 8 faiaoga. E fetuunai e tauala i le ratio foi lea o tamaiti aoga i le tulaga lea e i ai ia le latou numera.

E sao le afioga i le sui usufono, e tele foi lava ina afio atu ma talatalanoa i lou Ofisa ma faasoa atu i faiaoga. O faiaoga lava e tele ina lilifa i ai le saunoaga a le sui usufono, ia ou te manatua na alu atu i le isi aso fai mai ia te au, ‘Loau a e alofa e a si teine la e i o i le matou aoga e a pe a aua le aveeseina i se isi aoga’. Ou fai atu oi e a? Se la e lelei lava si teine e tuu ai pea i o i le matou aoga. Ou fai atu e leai se mea o i ai afai e lelei ia e mafai ona tuu pea, ae o fai ma e asiasi i le aoga, ia fai mai e asiasi atu lava o la e galulue nai faiaoga.

Ou te manatua na ou asiasi i le itumalo lea ou te alu atu, o la e talatalanoa isi loomatutua i fafo. Ia na ou fai atu lea i ai, o faatali nai lua alo se i tuua le aoga? Ae te i ua fai mai ia te au, leai o maua o faiaoga. Ioe, o la e talatalanoa i fafo ma fai a la tala. Ou fai atu, oi, o le mea la lea na e... mo mea o faiaoga litaea foi nei. E mafai lava ona apply atu e i ai foi tulaga e tatau ona atagia ai ina ia mafai ai ona toe faaauau le aoga i toe lauga ai foi se isi sui usufono. Ae o lo o mafai ona i ai ia tatou faiaoga litaea, e ui ina faapena ona matutua foi i tausaga, ae o lo o mafai lava ona faaauau. Ia ma le agaga faaaloalo lau Afioga.

**FOFOGA FETALAI:** Faafetai, ia ua manino auofala, ia se i tulai mai le sui usufono se i tau... o faaola ea lau mic? Se i alofa ae Aliimalemanu ma Afoa se i faaola ifo le mic a le sui usufono, ia...

**Afioga TAPULESATELE MAUTENI TAMASONE METULI II ESERA:** Faafetai atu i lau Afioga i le Fofoga Fetalai, ia o lea ua matau atu i saunoaga foi a le Minisita o Faatoaga e moni lava ia, ae o lea lava e felogonai ma taumafai i le faiga o nai a tatou atinae ma tatou faatoaga, ae alofa mo nai niu na ma nai koko. O la ua tele lava isi meatoto ae e pei o le tulaga i nai mea na o niu ma le koko.

O le tulaga o lea na e saunoa foi i le ramp lea e pei ona talosaga atu ai, faafetai ae talosia ia ia vave ona i ai se tulaga faapea. E moi lava foi e le o tele tele foi...

**Tofa Hon Lopao Natanielu Mua:** Lau Afioga i le Minisita i se avanoa.

**FOFOGA FETALAI:** Ia se i tulai mai le Minisita o Faatoaga.

**Tofa Hon Lopao Natanielu Mua:** Faafetai, mo le silafia e lau Afioga i lalo o le polokalame fesoasoani Numera 2 a lo tatou Malo lea ua faasoa atu, o lo o aafia ai muamua ai le tiapula lea ua amata... lea ua faasoa atu i le atunuu atoa sei vagana nuu o la e tele ai ana tiapula e le o aafia. Aua e leai se aoga e ta te o atu ai e toe ave ni tiapula i nuu la e tele ia latou tiapula.

Ae o ai foi o koko ma ni niu la e i lalo foi o le polokalame lea, o lo o i ai foi... o la e ua ou te iloa po o le 10,000 le koko la e i le tatou falelaau la e i Asau i le taimi nei, toeitiiti lava oo i le taimi e faasoa atu ai, ina ia talafeagai le taimi e aveese atu ai ma le tatou lotoa ua lelei mo le taimi e tatau ona toto loa i se taimi mautu. O iloa foi o le mea lenei o le koko e le lelei le taimi e toto ai aemaise lava le koko faamili. A le malo le aa... a le vave ona malo le aa e pe vae atu le mamalu o le Maota. O lona uiga o le mea lena e taofiofi laitiiti, se i tau toeitiiti ifo se i tau faapea laitiiti i luga le koko mai i le mea la e faa... ia ona avatu loa lea i tua. O le koko lena o la e i ai i le taimi lenei.

Na talanoa atu ai ananafi e fai sina ae o lo o i ai ia lo tou afioaga i le faasoa lea mo le koko ma le niu. E tau vaivai laitiiti le niu e i ia le polokalame lena ua uma ona feiloai ai le... lea ua tuu atu i le Matagaluega e feagai ai ma le Matagaluega o Tupu o lo o tele ia o le niu o lo o lalau i lalo o niu. Pe a pe a fai se faasalalauga pe se polokalame e lau mai ia ona o lea o le Matagaluega e faasoa e toto ae o lo o taumafai lava ia le tatou niu ina ia aua ne i motu.

Ia ma le faaaloalo e faamalamalama atu ai le tulaga lea.

**FOFOGA FETALAI:** Ia se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e taua le faatupu manatu a le sui usufono. Sa ou asiiasi atu i lou itumalo i le talaga auala lea sa fai ma e ou te manatu o le isi lea itumalo e lelei auala. Ma e o le tatalo mai i koko ma niu, o koko ia e maua ia tatou, na aumai e Siamani, o koko tonu lava ia e manaomia tele e atunuu ia e gaosi ai le sukalati ona e le oona. Ae e le oona le koko e i ai le mea faaletonu na fai e tatou i le isi tausaga, o le tatipi i lalo o koko ia ae aumai koko Solomona e matua oona lava. Ia o se faaletonu foi i lena taimi sa le tatau ona faia.

Ae o lea la ua toe alu le toto o le koko lea, ae o le mea la ua tupu ua faalagolago tele mai i le Matagaluega o Faatoaga. O matou lava ia i tua i le taimi sa faagasolo ai ae e le i oo atu mea nei o... e le i faia ni polokalame ia o fesoasoani a le Malo, o mea ia sa matou faia. E te alu lava oe e filifili koko mai i ou koko, aumai le koko lelei ona e lau lava lea e toto, toto i lalo. O isi taimi e toto faatasi lava ia le tiapula ma le koko. Ia po o le masina ua tutupu ae lava le koko ia, ia ona fai lea o le talo ae alu ae lava ia le koko ia i luga.

O au lea ou te le o malamalama pe aisea ua le faia ai le mea lea i le taimi lenei? E pei ua avea ia faamiliga ua faia e le Malo, ua omai ai avatu koko ae o la e i ai koko la e fua. E mafai lava ona e alu toto au koko ona tau le tupu

ai lea o le mea lea e saunoa i ai le Minisita o le sii mai i totonu o pepa iila... oi o pepa uli ona toe tuu lea i totonu, e i ai lava le ono afaina. Ae o lau lava koko e toto mai i le fatukoko o lau lava koko ua e filifilia, e te iloa lelei foi, afai lava e pula samasama le koko, ma e toeitiiti atoa le futu le umi, o lou koko lava lena e maua. Ae o koko ia e te alu atu e avatu i i, e te leiloa po o le a le umi? E leiloa pe ave ifo e na o le 3 inisi le umi.

O le mea lena lau Afioga i le Fofoga Fetalai, o le faalavelave lea o isi faifaatoaga, ua ola faalagolago mai i koko ia e toto, ae afai lava o i ai lau togakoko, la le e taupe mai le anoano o koko, e te alu lava oe toto. O lona 2, le anoano mo popo ia e pauu ifo ma toe tutupu ae, e na ona e alu lava o oe tilotilo i luga i le niu, a e vaai atu e fua lelei le niu, ona e tago lea aumai le niu lea ua ola, ave e toto aua e toe fua mai foi le niu lapoa, e lapopoa fua, e lapopoa foi popo e maua ai.

O mea ia sa tatou faia, sa tatou le toto foi ni sa tatou le faatauina foi ni fetalaisa ae toto le gatae. O le gatae na e sau ai le naitosene e alu i lalo o le eleele faafetalaisa ai le eleele e faafetalaisa o le tulaga o le natura. O le fetalaisa e sili atu ona ola lelei ai talo ma fai i aso la, i aso la sa fai ai ia tatou faatoaga. Ae o le mea lea ua tupu i nei onapo, e pei a le alu atu lava ia Lopao e avatu ia mea, ona nofonofo ai lea. E te maua foi ia au mau tiapula i polili i le anoano o au talo e toto. Ae ua ese foi nei aso, ua faalagolago mai ia Lopao e lau atu tiapula ae o la e i ai lava ou toaga, e mafai ona maua ai lava au tiapula.

O le mea lea e taumafai ai le Malo, taumafai mo le mea o le self help, ae e le o le ola faalagolago. O le tulaga lena e le faapea o agai tasi i se itumalo, e lavea uma lava ia o tatou itumalo. E i ai lava le tagata e sau lava e avatu mea i i, ae o la e faulalai ia tiapula i le maumaga o le isi toeaina la e na o le 300 iata le mamao.

Ia lau Afioga i le Fofoga Fetalai, se o mea ia e faaaoga i ai le faautautaga tatau. Ia ae taua tele ia le faatupu manatu, o lau tautalaga o le faamalamalama faalauaitele i ai latou o le aufaifaatoaga o lea e tau faatalitali mai i le Malo, aua le faatalitali, aua o na lava e i ou lima, mea e mafai ona e ola ai.

Lau Afioga i le Fofoga Fetalai, ia o le tulaga lena o le faaueilavea.

**FOFOGA FETALAI:** Malo faafetai, ua faafogfa mai le itumalo, faafogfa foi le sui usufono. Ia o mea sa outou soifua ma o tatou ola ai ae e pei e faapena se lagona e sao lelei le fautuaga a le Palemia. O le mea lena sa o la e matou te faia e oo mai lava i le taimi lenei. Ia a sioti faamiliga a le Ofisa o Faatoaga ae o la e tele ia au. E le tau faataua na ona o atu lava avatu se loli lapoa e ave ai.

Ia ua maea le taimi o le sui usufono, faaiu mai le saunoaga.

**Afioga TAPULESATELE MAUTENI TAMASONE METULI II ESERA:** Faafetai atu i lau Afioga i le Fofoga Fetalai, se i amata atu se

faamatalaga i le saunoaga a le Palemia. E lagolagoina malosi e au le saunoaga a le Palemia ae e pei lava ina amata atu le tautalaga, o lea la sa faataua atu le faafaileleina o meatoto, aua e i ai le talitonuga foi lea, o le tulaga ua i ai le tatou Matagaluega o Faatoaga, e tusa e tele foi ia... o le finagalo lea o le Palemia. E tele lava a le matou aufaifaatoaga lea e faatinoina le tulaga lea. Ae e pei o le faatauaina o le tulaga lea o le faafaileleina o meatoto, e tusa lea ua silasila foi lea ma vaavaai ai tatou, o le mea e pito sili lea ona lelei lea e faatino mai i i. E tusa o le tulaga lena.

E faafetai atu ai i le Afioga foi i le Palemia ma lona finagalo o le tulaga lea ua saunoa foi le Minisita o Faatoaga, ia e tasi le mea se i na o taua ta talanoa, ae o le aoga ia o lau faamalamalamaga na i le totoina o le koko mo le isi vaega ia... ou te iloa e na o le Palemia le tagata lea... e pei foi o taua e feola ane lava ma soifua i le totoina o le koko.

O le... se i fai atu pea lau tala lea...

**Tofa Hon Lopao Natanielu Mua:** Lau Afioga i le Fofoga Fatalai...

**FOFOGA FETALAI:** Ia se i toe tulai mai le Minisita o Faatoaga.

**Tofa Hon Lopao Natanielu Mua:** Leaga o lea e augani mai i le totoina o le koko e sao. O le matou nuu e le faaaogaina le koko faamili, ae e pei ona saunoa le Afioga i le Palemia, o le mea tonu lava lea e maua ai le mea e tau o le true to type. O le tau sao mai lava o le koko ua pula, e tago loa lea ta le koko aumai le fatukoko tuu i le lefulefu, ia ona e lau loa lea toto sao lava ia le fatukoko lena. E ola ifo la le koko lena, e vave ona malo le aa, vave foi ona pii i le eleele, o le success rate po o le manuia o le taumafaiga lena, ua masani ai le itu Asau.

O le tele o le koko la e faamili ia tatou, e tele lava ina ave i isi nuu, ae o le itumalo ia o Asau, e tele ina faapena e faapena foi la ia lou nuu. O lou togakoko leiloa pe 60 eka, ae e toto uma lava faapena. E le tau tigaina e tau o i se... ae o le isi mea e pei e tau mumusu ia o matou tagata foi lea e tau tautau ia le metotia lena i ni tagata ne i te i ua iloa uma ai, ae o lea ua tau atu, o lea ua tau atu i luma o le atunu o le auala faigofie lena e toto ai le koko. Ia o le tau mai o le koko pula, tuu i le lefulefu, e ala la ona tuu i le lefulefu, ina ia aua ai ne i ai e isumu ma loi.

Ia o le tulaga lena e ala ai ona fai faapena e faigofie ia, ma o sina faamalamalamaga na o le tatou mataupu na e pei ona saunoa mai ma tau augani mai ia le Afioga i le sui usufono mamalu ma le faaaloalo.

**FOFOGA FETALAI:** Ia malo faafetai. O lena. O le itumalo o Vaisigano o le itumalo toto koko. Ioe, e numera tasi lava ia Vaisigano i le mea o le koko. Ia na ona faamanatu atu leaga o taua uma e omai i Vaisigano e ese...

ae seivagana ai lou tofi faipule o lea ou te tu ai i i Fasitoo-uta. Ae tulai mai le sui usufono e faaiu mai le saunoaga ua maea lou taimi.

**Afioga TAPULESATELE MAUTENI TAMASONE METULI II**

**ESERA:** Faafetai atu i lau Afioga i le Fofoga Fetalai, ia o le a taatia ia le tulaga lea i le koko ae faamalo i lau Afioga i nai a tatou pole fagota lea e aafia ai le aloalo ma le moana. Ia e moni lava e le o tau i ai ia ni a tatou vaafagota, ae o si o matou itumalo ma le tulaga foi i le ramp lea sa taua, ia silasila ane i ai. Ia alofa ane ma siaki ane ia tatou pole.

Ia lau Afioga i le Minsita o Aoga, taatia ia le tulaga lea leaga ua ou faalogo atu ua e talanoa i tamaitai. E faafetai atu o na e silasila ane lava i ai e faamautu ia tatou faiaoga.

O le... si mea laitiiti lava lea e avatu ai pea se tuualalo lau Afioga i le Minisita o Faatoaga. O le tulaga lea e pei o nai faafitauli lea e tulai mai o lea foi ua taua le mea lea o le lausului o le fai lea Isarelui. Ae foi lea e ta te tau manatua lava i nai mea ia ua tuanai atu mea ia o faataitaiga foi ia o meatoto ma mea o manu ma mea faapena. O lea foi sa i ai le tulaga lea ou te faalogologo atu lea sa agai i ai le finagalo o le Palemia foi lea i le koko, aua o le faataitaiga o le koko Solomona foi lea e taumafai e aua le toe faia ni tulaga ia leaga o lea na tatou maua i le koko lena ua aumai foi lea pei ua

**FOFOGA FETALAI:** Ou te..

**Tofa Lopao Natanielu Mua:** Lau Afioga i le Fofoga Fetalai...

**FOFOGA FETALAI:** Ou te faauilavea i le saunoaga a le saunoaga a le sui usufono ua maea lou taimi faamolemole, faaiu mai lau saunoaga. Tuu atu le avanoa i le faauilavea a le Minisita o Faatoaga.

**Tofa Hon Lopao Natanielu Mua:** E 3 lava ituiga koko ia ua...o le koko lea e tau o le criollo, o le koko lena e top quality lava lena, o le isi koko o le forastero ma le koko lea e tau o le trinitario koko. O le koko lea Solomona e tau o le almanado ua tele ina aveese uma. E tele lava i le itumalo o... aemaise le matou itumalo. O le tele o nuu ma alaalafaga sa faasolo i ai le koko lea e tau o le koko Solomona, lea e tau o le almanado ua aveese. E oo foi i atinae sa asiaasia i inei i Upolu, sa ou matauina le le toe i ai o se koko Solomona. Ae pau lava o le mea ua feusuai le koko lena, ma o lea ua i ai le aafiaga tele o le koko. Ae o lo o i ai le togakoko la e i uta i Masamasa. O le mea lena na ala ai ona ou inaina lava e toe faaaoga, o i ina o la sa i ai... ona e mamao ese atu ma le tele o... O lo o taumafai mai ai la le faamiliga lea e toe tufa mai ai le koko, e maua uma ai lava le koko lea e alumia tele le top quality chocolate, e tau o le criollo. O le koko lena a outou vaai i ai, e lanu mumu ae lamolemole, tele lona tino. O le koko lea e tau o le forastero, e lamolemole

lanumeamata ae le tele tele. A o le trinitario, o le koko foi lea e te vaai e umi pe laumiumi ae pei e patupatu lona pot. A pula e mafai ona pula mumu pe samasama ua leva, ae faapena lava foliga o koko ia, ina ia malamalamalama ai i le eseesege o ituaiga koko, aua e te popole i le tulaga lena, ua tele ina aveese le... e te le toe vaai i se koko Solomona i asiasiga lea e masani ona fai. Ae atonu e i ai nisi vaega o le atunu o lo o ola ai pea le koko Solomona. Ae ou te manatu o le aafia o le feusuaigna i le vaitaimi na aumai ai, ma tatou koko ia. E i ai foi le lafufitu la e, toeitititi lava tutusa ma le trinitario. Ma le faaaloalo e faamalamalama atu ai i le sui usufono mamalu ma le Maota nei.

**FOFOGA FETALAI:** Ou te faamalulu atu i le sui usufono ua maea lou taimi. Se i tulai mai se i faaifo mai lau saunoaga. O le tatou galuega e fai foi i le ava fatafata. Ou te faamalulu atu i lau Afioga...

**Afioga TAPULESATELE MAUTENI TAMASONE METULI II ESERA:** Faafetai i lau Afioga i le Fofoga Fetalai, masalo o le a faaleo atu ia na o si mea lea e tasi, ona fai atu ai lea o se tala puupuu i si o tatou itumalo, aua e le tele lava.

E faafetai atu lava i le Malo, Minisita o Pisinisi Alamanuia ma Leipa, i le tulaga lea e pei ona agai i ai o tatou tagata i galuega faavaitaimi. I le silasila lea a le Malo foi, i le taumafai e faaaoga a tatou aoga faamatata lea e i ai, ina ia saili ai tomai faapitoa ia po o matata ia, e pei o le kamuta po o le palama ina ia maua e o tatou tagata tomai ia. Aua o lea e matau atu, afai o le faavaitaimi e pei lava o le tauapu lea tatou te agai ai i o, ma le teulaau ma le fasimanu. Ae silasila foi lau Afioga, o le tulaga lava i mea ia o tomai faapitoa ia o tomai faamatata. E tusa o galuega ia ma tomai nei, e manaomia lava e so o se atunu, mo lona atinaeina. O le tulaga la lena, e avatu ai se tuualalo e silasila ane i le tulaga lena e faamautu lelei tomai faapitoa ia, ma taumafai ai e agai atu i Niu Sila. Aua tatou te toe o i galuega ia faaleipa ae tatou o i matata...

**FOFOGA FETALAI:** Se i tulai mai le Minisita o Pisinisi, Alamanuia ma Leipa, ona faamaea loa lea o lou taimi.

**Afioga Hon Lautafi Fio Selafi Purcell (Minisita mo Pisinisi, Alamanuia ma Leipa):** E faafetai atu i lau Afioga i le Fofoga Fetalai, mo le silafia e le sui usufono mamalu, o le vaiaso lea na tea nei. E 61 a tatou tagata faamatataesese lea sa faauu. O le tausaga na tea nei e 48 i kuata eseese. O le mea lena o lo o faataua e le tatou Malo i lalo o le tatou Polokalame o le Faa-Aperenitisi. O lea foi ua sui le tulaga, o lea ua aumai ai i totonu ma le tatou vaega o Tusi Pasi Taualoa, o le Samoa Qualification Authority. Ina ia maua e tatou le tomai lea, ia ma mafai ai ona maua ai lau galuega pe a o i fafo. O

lea la e uunai e le Malo ia atinae ia, o le Matataesese, o le Palama, Eletise o le fai taavale o le uelo.

O tomai uma lava nei, o lea e tuufaatasi i totonu o le tatou Polokalame lea, ina ia toatele lava ia tatou tagata, e maua le tomai lea. Aua o lea e iloa e le Malo, o tomai nei e mamaomia mo le atinae o le atunu. O le vaega lea e o i le Polokalame lea e o i le Seasonal Work, o si vaega e le i lelei ni aoaoga, e le i oo i le tulaga lea. A o latou lava ua mafai ona ausia le tomai lea, lea ua iu mai i Kolisi. Ua o mai e naunau i le tomai lea, o lea la e uunai e le Malo i lalo o le Polokalame lea. Ae silafia foi o lo o i ai le isi vaega o le Polokalame lava lea o le Seasonal Work o lea e fai i Niu Sila, o lea na ave ai o tatou tagta kamuta. O lea na ave e fesoasoani i lalo o le Polokalame foi lea o le toe fausiaina o le nuu lea o Karaiesetete. O la la e faigaluega ai o tatou tagata e tai tolu tausaga, ma isi ua toe faaopoopo o latou taimi. I lalo lava o le Polokalame lea ua taua o Galuega Faavaitaimi. O lea ua i ai ma le vaega lea o le au kamuta la ua o ai. E toatele o tatou tagata la ua maua ai manuia. O le fuafuaga ia maua o latou tomai ma o latou Tusi Pasi. Ona toe foi mai lea i Samoa e galulue ai, i le tulaga maualuga lea e galulue ai la atunu.

Mo le silafia e le sui mamalu, o lo o faataua e le Malo le tulaga lena.

#### **FOFOGA FETALAI:** Se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga e taua lava le faatupu manatu mai o le sui usufono, ona e aoga lana faatupu manatu e malamalamai atili ai mataupu nei. O lea ua saunoa atu le Afioga i le Minisita o lo o nafa ma i latou nei. Ae i le amataga mai o le Polokalame lenei i le taimi o Helen Clerk, e le i faigofie ona o la foi e i ai tagata e le o faigaluega a Niu Sila. Ae pei sa i ai le tulaga mautinoa, pei e faale-fiafia tagata ia e leai ni galuega, e o i galuega ia o taugaapu, e palapala ai o latou lima e faigata, maosiosia ai ma vae tulou. Ua alu alu ia le tulaga lenei, ua iu lava ina le mafai ona taofiofi le faitio o le aufaifaatoaga i le Vaega Faaupufai a le Leipa. O le ala lena, na amata ai loa faatalanoaga nei, talanoa mai i le tatou Malo, talanoa i isi Malo, ia o se fiafiaga tele mo i tatou. Aua o le agaga lena o le Faigamalo lenei, e saili galuega mo a tatou fanau. O le tulaga la na oo i ai, na o le 3 lava masina, ona o le itu lea. Ua matua fefefe lava le Malo i le mea lea o le o atu o tagata, faaaoga le auala lea e overstayer ai i o. O Toga o le atunu muamua lava na faalumalumaina ia le Polokalame lenei. Ua o atu lava isi ma le toe o mai, o le ala lena lea ala ai loa ona faatulaga loa a tatou Tulafono, e faaupu i le gagana Peretania o le zero tolerance. O lona uiga, e na ona e pio lava, tipi ma oe. E te le toe alu i se galuega, ma agai atu ai foi ina afaina ma le afioaga. E afaina loa se isi mai le afioaga lea ua le toe foi mai, taofia ai lava ma se tagata e toe alu o lena afioaga. Ona sa avatu le feau taua ia Niu Sila, o lea ua aafia le Malo, ma e le sao i i se faitogafiti, ina ia

liliu atili mai ai le agaga o le Malo o Niu Sila ia tatou tama fanau. O lea la e i ai le faiga faavae lena, ua matua faatuatuaaina ai e le Malo o Niu Sila ia lo tatou Malo, i le matua vailiili lelei o i latou e o.

Sa i ai mea na tutupu i le amataga, o le mea na tutupu, ua o ane foi o tatou aiga i Niu Sila, ma taitaiseseina fanau. Vaai e mafai lava ona e nofo loa i i, sola loa i lalo e te lafilafi solo ai, ina ia maua ai lou nofotumau. Aua e toeafe lava ona maua sou nofotumau i galuega na a le Malo. O le mea la lena i faafitauli i le amataga, ae na faapea lava ona fofo ma fofo auauai. Ona e i ai foi auala a le Malo o Niu Sila ma lo tatou Malo na taoto, po o fea lava e agai i ai, e maua lava oe. E pei foi o le mea na tupu i le Malo o Toga i isi foi tagata e o atu ua le o mai ae sosola i aiga.

O faafitauli ia lau Afioga sa faafegai ma le Polokalame lea, ma faatulaga ai lava ia faafitauli. O le ala foi lea e matua ou agai ai lava ma fai lau tautalaga ia tatou tama fanau, ma tautau ia i mea ia, ia aloaloese mai ai. E matua leai se fia faalogo o le Malo o Niu Sila i ni tagata e avatu galulue i trades. E le itiiti ifo i le 10 tausaga, sa fai ai pea e tatau le tauanau lea, e talu mai lava le tausaga muamua na oso ai mafuie, ma faatafunai le aai tele i Kalaiesetete, ma agai ai loa le Malo o Niu Sila e toe fausia fale ua faaleagaina. O le faamanuiaga lena o tatou, ae le i faigofie, e toeitiiti atoa le 10 tausaga o tauanau lava, tauanau lava, ma tauanau lava ona o lea e toatele a tatou kamuta. Ae ua alu alu le galuega ua toe reconstruction o Kalaiesetete, ua le gafatia e Niu Sila, i le tele o galuega, ma le toatele o tagata manaomia. Ua alu alu lava, ua le mafai, ua le mafai lava ona taofiofi o tatou tagata. Ae tasi lava le mea na taofiofi ai e le Malo o Niu Sila, leaga o le mataupu lenei sa talanoaina i luga, e au ma le Palemia faapea foi ma Minisita.

Sa i ai le latou tapu, sa amata muamua i le 8,000, e tapu ai i ina, ona o le agaga lava lea e taofiofi galuega, aemaise lava le taimi ua lalata i le faiga palota. Na iu lava ina ou malaga ai i Niu Sila ma matou talanoa ma le Minisita, na iu ina ou valaaui aia, e o mai i Samoa nei, e matamata ai, i le mea o le a fai e Samoa, o le a matuai faatutupa e Samoa le All Blacks i inei. O tagata uma nei, e pau lava le agaga ia malo le All Blacks. Na fai ai lava ma le Fono sa ou auai, o le a usu i Samoa le Fono i le aso tonu e fai ai le taaloga lenei ma le All Blacks, lea la na o mai ai. Na masii mai loa matou fono i le TATTE, ma ou toe tautala ai malosi i le mea lea, tatala la outou tapu. Vaai i le tele o faatoaga o lea faatoa mafai ona toe faaopoopo isi eka fou, ina ua iloa o lea e alu atu pea tagata i Samoa nei ma isi foi atunuu o le Pasefika. Na ou vaai ai i le toe faaopoopoga o mea o faatoaga fou, apu ma isi fualau aina. Fai mai le tala a i latou nei o aufaifaatoaga, ua outou vaavaai atu i faatoaga fou ia, e le mafai ona matou faia mea na pe ana leai tagata ia e omai Samoa, Fiti ma Toga, e aupito toatele lava tatou. Aisea? O se mea matavale le fua paau ifo i lalo e leai nisi latou te tauina.

Lau Afioga i le Fofoga Fetalai, e le i faigofie le mea lea. O le a la le mea na tupu? Ua moomia pea e Niu Sila ina ua tupu le tamaoaiga o Niu Sila i

tagata nei e o atu i le Pasefika, aemaise lava la Samoa, ona o le toatele o tagata ia, o taulelea e omai mai tua ua masani i le galulue. O lea la ua alu alu le mea, ua faaopoopo ma le 3 masina ua 6 masina, ua mafai ona toe o. Ua avatu ai loa ma tagata ia, e i ai o latou tomai faapitoa toe faaopoopo atu i ai ma le au fasimanu. Sa ou asiasi i Dunedin ma ou vaai i ai i le galulue a tatou taulelea i le tulaga ia o fale fasimanu ma na latou tau mai ia te au, o lea foi ua mafai ona nonofo ai mo le tausaga atoa, a uma le tausaga toe omai e malolo toe mafai ona toe o.

Ia o lea foi la ua vaavaai mai vaavaai mai Ausetalia i le alualu lelei o le polokalame lea, ia oso mai foi ma Ausetalia ia i totonu. O le a la le mea lea ua fai e Ausetalia? Ua le tasi le tausaga a ua 3 tausaga. Uma le tausaga, sau malolo toe alu, toe sau malolo. O isi, ua o atu lava ma usugafa ai i o ma le toe omai, ua maua ai ma latou sitiseni. E tele auala lau Afioga e aumai e le Atua e faamanuiaina ai a tatou tama fanau, ae taua le faatupu manatu a le sui usufono, aua a na leai le faatupu manatu e le mafai ona faailo le talatuu, le talafaasolopito o manuia ia ua tatou maua, e le i faigofie le mea lea o le finau ma le talitonuina o le tatou Malo e le Malo o Niu Sila, ona e tausolomua ia tatou ona faataoto taiala mo a tatou fanau ina ia teu le amio.

O ananafi, leai o talaatu ananafi, na ou valaauna ai le fono ma le Afioga i le Minisita nei ma le Ofisa Sili o Pulega o le Matagaluega, ona ua ou maua le lipoti i inugapia na fai e le isi toa-5 o tatou tama na o, ae omai uma i le Aai o Fiti. Ua molia e le isi na alu atu e talanoa i ai i le malaga lea talu ai, na alu atu i ai e omai loa e o e i ai le mea na faamoemoe e o i ai, ae o atu o fai mai le inugapia, e tofu lava le tagata ma lana pusapia. O lea la ua augani atu le tama lea ua outou faia tonu lava le mea lea na lapatai ai tatou, ae omai le aualii ia fasi, na totolia ai le ulu. E leai ma se upu faapena na iloa e le Matagaluega. A na le tofia lava le alii lea o le a le alu, e le tautala. A o lea ua i totonu o le lisi le isi toa-4 lea o le a o, ae le avea si tama lea, o ia lea na mafua ai ona oo mai ia te au le faamatalaga, ona fai ai lea i le aso ananafi le iuga, e toe aveese latou ia, ae toeitiiti lava oo i le taimi e ave ai, ae omai uma i le Aai o Fiti. O lea foi la ua tapu ai i latou uma e omai i ina, mea o aai foi ia, e le o ni aai o lo o i ai se pulega mamalu a alii ma faipule, e tupu mai foi la le tupulaga, o ni tupulaga faigata tele.

Lau Afioga i le Fofoga Fetalai, o lau faafetai lena, e le faigofie le faafoega o le tatou polokalame lea e le Afioga i le Minisita, ona o aga ia e fai e le autalavou, e ono faalumaluma ai lava lo tatou Malo, ona e oo loa lava i le taimi e vaai atu ai ua sau pusapia, galo uma mea uma sa fautuaina ai. E maua lava la latou na ma tapu ai lava e le toe foi i fafo i le tatou Zero Tolerance Policy e le talia e le Malo se amioga e ono aafia ai le avanoa mo isi fanau a Samoa, i latou uma ua foi mai ua o faafia, o le matua maoae o le mea la e ua i ai aiga. I le atu Falealili, ua matua ou vaaia ai le tele o atufalega lelei, ma aiga ua le tasi le taavale a ua sili atu i le tasi. Ona ou fesili lea, o latou uma nei, o latou sa paau atu i le polokalame lea a le tatou Malo.

**FOFOGA FETALAI:** Malo faafetai. Ia ua manino ma malamalama le tulaga, ia, ua tasi le mea sao a le sui usufono o lea sa saunoa, ua e laga mataupu ia, o lea ua faamanino ai le taua o lenei foi alagaoa ua maua mai e ala i faamanuiaga i alo ma fanau, manaia. Ioe.

O le mea la lea, faaiu lelei mai loa le saunoaga o lea ua maea le faamalamalamaga o le mataupu lea ua maua ai lau mea sao.

**Afioga TAPULESATELE MAUTENI TAMASONE METULI II ESERA:** Faafetai atu i lau Afioga i le Fofoga Fetalai. Faafetai mo le saunoaga manino a le Afioga i le Palemia, o lea ua matau atu tulaga uma ia, e lagona ai lava le fifia ma le faafetai i fuafuaga a le tatou Malo. Faafetai i lau Afioga i le Minisita. E pei o se manatu lena ona o le tilotilo lava ia tatou o e faatino galuega ia ua leva foi ona atinae ma ua matauina lava e tatou ia ma le lalolagi, e ese foi le tulaga ua i ai le tatou atunu i lona atiaeina. E faafetai atu ai.

Ia leaga o lea ua faauma mai lou taimi, ae na o se fuaiupu lava lea e tasi lau Afioga i le Fofoga Fetalai, ona o le tulaga lea e faailoa atu e lagolagoina e lenei sui usufono le Tala Faatatau Faaopoopo (Nu.1). Ae faapuupuu atu lava na o mea ia e 3 i le tulaga lea, faafetai o lea ua i ai le finagalo o le Matagaluega foi i le Afioga i le Minisita i le tulaga lea e faatino le Sui Komesina mo Savaii i le tatou falepuipui. Ia o lona tulaga lena, leaga ua moomia tele foi lea aua le soifua saogalemu o nai o tatou tagata. Ia o lena foi ua i ai le fuafuaga mo le Sui Komesina mo le auaunaga o falepuipui.

O le tulaga lona 2, ia, o le tulaga lea pei ona taua foi e nisi o sui usufono, le tulaga lea o le auala foi lea i uta i Vaiaata. Ia o le manatu lava lena e tasi na ona toe faaopoopo atu, e tele fanua i le va o aai ia i tai o le Faasaleleaga ma Amoa, ua moomia lava le fai lelei o auala na se i galueaiina ai fanua ia. O le tele ia o fanua ae faigata ona galueaiina o le lelei o auala. O lea la ua lelei le auala lea i uta, a o le va lea o aai ma le auala lea i Vaiaata. Ia, ma le tulaga lea i le tatou fuafuaga foi lele i se vaegatupe mo le auala fou lea i le maketi i Sogi.

Na pau lava si tuualalo foi lele, se i silasila ane e faatino i se faatinoga, o lea ua matauina o nofoaga nei e lolovaia lava ma maua ai le suasami. O le tele foi o nofoaga na o si palapala ma le eleele e pito i lalo. Se i fuafua lelei le faatinoga o nei mea ia aua ai ne i toe...

**FOFOGA FETALAI:** Ia, se i tulai mai le faauilavea.

**Afioga Hon Lautafi Fio Selafi Purcell:** Lau Afioga i le Fofoga Fetalai, faafetai i le sui usufono ua toe laga le isi mataupu leaga o mea ia e i lalo o lau... Ua uma ona fai fuafuaga uma mo le tanuina o le tatou maketi lea i Sogi ma ua i ai foi inisinia ua uma ona fai a latou lipoti. Ia, po o le masina fou e amata ai loa ona tanu le tatou vaega lea e faatu ai le maketi, ia ma tanu

atu ai ma autafa atu pe a uma ona fai le maketi, alu lava i luga o mea ia ua uma ona faataatitia mai e latou e i ai le tomai faapitoa. Ae aua e te popole ua uma ona silasila uma i ai inisinia foi a le... ma latou konekarate i le tele o le sami ma tulaga uma faapena, ae ua uma ona fuafua tulaga ia, e logo atu ai i lau Afioga.

### **FOFOGA FETALAI:** Malo. Ia...

**Afioga TAPULESATELE MAUTENI TAMASONE METULI II ESERA:** Faafetai lava i lau Afioga i le Minisita. Ia, o le a le toe i ai se faamatalaga, leaga o lea ua fai atu le tala i lau Afioga i le Fofoga Fetalai, ae taatia ia nai isi vaega ia. Ae puupuu lava sina faafetai foi lele i si itumalo.

Ia, avea lenei avanoa e faaleo ai le faafetai i si ou itumalo o Vaisigano Nu.2 i nai o matou nuu i Papa, Sataua ma Fagasa, e faapea foi le faailo o le faafetai i nai aiga e le gata i Samoa nei a o atunu u e mamao i nai o tatou nuu.

E talitonu le faamoemoe o lea ua ae ma le manuia le faatautaiga o lo tatou sa i lenei Paeaiga o le Palemene o Samoa, ona o la outou tatalo ma le lagolago i se tautua le atoatoa a la outou sui usufono. Ma e momoli atu ai le agaga fiafia ma le faamalo mo la outou tapuaiga, ae tatou te manatua pea le tatou folauga i le finagalo o le Atua ma Lana valaau paia i nai matua na nai fanau ina ia maua pea Lana faamafanafanaga mo i tatou.

Ou te faafetai atu i Ekalesia uma i nai o tatou nuu i le Aufaigaluega Paia a le Atua o faafalelemalu aua le tauasuina o le vai o le ola mo se manuia o le tatou itumalo.

E faafetai foi i nai o tatou nuu o paia lava ia i le afifio o afioga i Aiga faapea le fetalaiga i le falefa o Sataua lau Fetalaiga Lealuga. O paia lava aua le afio o le alii o le nuu, Ufagalilo ma Luapitofanua ma le Maopu, e faapea foi Aumua ma Maninoa, Faitau ma Utuutu.

E faafetaia le lagolago ma le fesoasoani mai a le itupa o tina ma tamaitai, saoao foi ma aualuma, le malosi o le nuu aemaise o nai a tatou fanau. E faafetai foi i galuega mo le atiaeina o si o tatou itumalo, le galuega faifaipea a Sui o le Nuu aemaise foi Sui Tamaitai o le Nuu faapea foi Komiti a le Malo. Sa taumafai lava ma le agaga maulalalo ma le loto finafinau aua se manuia mo le tatou itumalo i le auai i le Faigamalo a le Vaega Faaupufai a le HRPP e pei ona i ai. E moni o a outou talosaga ma faamanuiaga ma lou galue e tautua ai lenei Paeaiga, ua taunu manuia ai le tatou folauga. Si ou itumalo, faamagalo mai ni faaletonu o lo outou sui usufono.

Ona faapea lea, lau Afioga i le Fofoga Fetalai, lea ua toe o se aga ona silimea lea o le seuga, ua e manumalo ma e faamalo atu ai ma faafetai i lau tautua faatamalii, aua le faatautaiga o le tatou Palemene i lenei Paeaiga. Fai mai foi le isi muagagana, e sua le ava ae to le ata, i e ua faamanavaina ma valaau le Tama o i le lagi i lana auauna ia Vaafusuaga Toleafoa, ia i ai le toofilemu o le Atua i le faletua ma si o la alo ma le aiga. Ma e manatua pea

lea tamalii ma lea uo. Ia manuia tele sui usufono o le Palemene o lenei Paeaiga, ia manuia le alo atu i faiga filifiliga o lumanai nei a le Palemene i le taitaiga a le Atua Silisili Ese. Soifua ma ia manuia.

*Na faaalia le agaga fiafia o le Palemene i le patipati o latou aao i le maea ai o le saunoaga a le sui usufono mo Vaisigano Nu.2.*

**FOFOGA FETALAI:** Malo faafetai, malo saunoa i le Aiga o Mavaega i lau Afioga i le Tapulesatele. Ua faafofoga foi lo tatou itumalo, ia, faamoemoe i le Atua ia faaaupuegaina pea lau tofa aua le feagai ai ma niso o tiute o totoe o lenei foi Paeaiga. Ia, faamoemoe foi i le Atua aua le faalagamaea a le atunuu ma lana faiga filifiliga, ia alofagia e le Atua e faapena ona afe pea manu i lo oulu faamoemoe, aua le tapuai mai o le itumalo. O le mea la lea e momoli atu ai le faafetai i lau saunoaga. Malo faafetai le galulue.

Ia, ua ou manatu o lea ua tatou tulalata i le tatou malologa, i le taimi e maea ai le tatou galuega, ona i ai lea o le manatu, ua lava ia ia galuega mo lenei aso.

Ae faapea le taofi, ae tatou te le i tolopo mo le aso a taeao, ou te tapa le sui usufono mo Faleata Sasae, le fetalaiga ia Salausa na te faaiuina le tatou Fonotaga i se tatalo.

*Na tolopo Taualumaga a le Fono Aoao Faitulafono i le itula e 12:47 i le aoauli seia aulia le Aso Faraile, 29 Ianuari 2021 i le itula e 9:00 i le taeao.*